

萬 有 文 庫

第 二 集 七 百 種

王 雲 五 主 編

樊 榭 山 房 集

(二)

厲 鶚 撰

商 務 印 書 館 發 行

樊榭山房集

(三)

厲鶚撰

國學基本叢書

樊榭山房集卷第六

詩已

早春游湖上聖因寺四首以下

千峯皴粉雪初殘。趁得閑身自在看。日色未高船放早。游人應不畏春寒。
琉璃地滑碧無痕。多少垂楊繞寺門。纔試東風絲已動。舊栽新種盡承恩。
禪寮一半瑣窗開。上盡迴廊更上臺。想得天工營構巧。湖光高下逐人來。

絕頂亭虛眼倍明。雪消雲並畫闌生。誰能喚取張春水。共賦蘇堤綠漲平。
元錢唐張叔夏春水詞爲古今絕唱人以張春水目之見鄧牧琴伯牙

荆溪道中

如畫雲嵐西復西。梁溪幾折入荆溪。舟師失道隔烟問。山鳥畏人穿竹啼。

上巳集葭白齋

盡日添衣怯峭風。春光一半水流東。老催花事來心上。醉戀朋歡在客中。小海無人知夏統。草堂何地著盧鴻。
時葭白將移居從教天地蘧廬似。剪燭題詩不易同。

廣陵送壽門游河東

共話風塵裏。臨分剋後期。人同歸雁去。樹接暮雲垂。汾曲存勤儉。江南重別離。登樓吾亦嬾。爲子立移時。

馬秋玉佩兮招飲出觀顧定之墨竹

上有張伯雨鄭元祐朱澤民題句

晉代愷之工畫人。元代定之竹寫真。仲文幼輿何足貌。不如此君下筆親。雲根移得波濤窟。晴翠翹翹鸞尾揭。新筍高於舊竹竿。留取抽梢當五月。南齋娛客乃爾清。酒半展軸聞秋聲。世閒何者善用短。奇絕題詩尙左生。

題秋玉佩兮街南書屋十二首

小玲瓏山館

鑿翠架簷楹。虛敞宜晏坐。題作小玲瓏。孰能爲之大。

叢書樓

世士昧討源。汎濫窮百氏。君家建斯樓。必自巢經始。樓中藏書甚夥。近更廣搜經義。補所未備。

透風透月兩明軒

前後風直入。東西月橫陳。主旣如謝諫。客合思許詢。

覓句廊

步欄何透迤。晝靜無剝啄。好句忽圓時。花陰轉斜桷。

紅藥塔

種從亳州移。不是劉郎譜。春風一尺紅。塔前暈交午。

石屋

峯豁似天造。華陽南便門。尋仙恐迷路。不敢躡雲根。

看山樓

青山復何在。烟雨晦平陸。待得晚秋晴。徙倚闌干曲。

七峯草亭

青峭落窗中。翛翛竹風舉。悠然欲揖之。恍見林下侶。

梅寮

繞舍玉梢發。嫩寒先起探。絕勝塵土客。落月夢江南。

清響閣

橫琴小閣閒。希聲寄絃指。蕭寥不可名。松風亂流水。

澆藥井

久視託靈苗。仰流資灌溉。際曉轆轤聲。衆芳欣所在。

藤花菴

依格青條上。垂簷紫萼斜。天然妙香色。合是佛前花。

題七姬權厝志拓本

張羽文宋克書。盧熊篆蓋。

潘將軍識將。沼吳出戰未。北摧羣珠雉。經聊酬貫魚。寵鬼妾肯奉。他人娛。齊雲綺羅付一炬。無此高文照千古。春深誰上七姬墳。月明曾過三興土。張士誠府基。取三興土築成。謂長興嘉興宜興也。

去年十月。舍弟子山舉一男。未幾而殞。追感賦此詩。

入手嫵媚卽夜光。每因追憶倍心傷。含飴未得娛大母。吟苦何緣學二郎。落落衰門慳雀賀。迢迢貧境想熊祥。再來若似前人事。好拜弧南乞命長。

哭吳丈志上

北郭幽人住。扁舟數往來。十年交恨晚。終古別堪哀。大藥成難待。名山業未灰。斜廊曝晝處。尙想立蒼苔。吳丈書齋有曝晝廊。

無盡意齋坐雨同陳江臯作

分得荒齋曲彖牀。不嫌風雨共相羊。經旬泥酒渾成病。五月披裘未是狂。花落冬青泥滑滑。魚跳時白水

茫茫新謠莫漫編甘澤有約初晴看插秧。

明鄭貴妃書泥金普門品經同丁敬身作四首卷首題云大明萬曆甲辰年十二月吉日皇貴妃鄭謹發誠心沐手親書觀世音菩薩普門品經一

卷恭祝今上聖主祈願萬萬壽洪福永享康泰安裕吉祥

梵夾盜青出漢京。翊坤題處最分明。依稀買得研神記。紙上香多蠹不成。明大內寫金字經多用

巧笑由來雨露偏。佛恩遺在聖人前。開函稽首無他願。一筆泥金壽一年。

柘館餘閑罷女紅。祝釐不與衆嬪同。也勝密誓高元殿。小字親封玉合中。

城南詩老觀空久。特賦新詞繼夢華。更待秋山黃葉下。與君禮足九蓮花。靈隱寺有慈聖李太后賜九蓮觀音一龕

五月二十五日艮山門外晚眺

吳天入時涼似水。袂衣出城三四里。城角遠山青半環。分得濃嵐落漁市。荒陂繚紹行何求。雲影水中凝不收。蓬科誰與作都祭。陰森大樹堪蔽牛。幾家叢薄徑微窄。稚髻闌離窺過客。櫻欄散葉覆深井。薜荔牽絲護敲壁。喜聞田水夜初滿。不道瓠花朝更坼。半虹忽墮橫一橋。恰當高處風刁騷。四天萬綠染未銷。峯尖黃鶴如可招。畫本髣髴臨山樵。深林絕壑藏過雨。山中茅屋愁漂搖。道旁日暮紛惆悵。白荷欲語嬌相向。斜倚珠盤踏寒浪。菰蒲低處見船行。弭櫂無人能一訪。我時小極因廢書。消憂起病兩有餘。但思臨平考古蹟。安得湯鎮謀村居。朝廷蠲租詔寬大。官府勸農意樂胥。攜孳亦可號蠶室。息影頗愛開蝸廬。試歌

元豐歲連稔。姓氏何必聞鄉閭。

葭白餉琴魚

聞道琴溪上。春風出小鱗。如何附仙籍。翻使困漁人。味淡供清茗。形枯借綠蘋。因君搜水物。欲謁敬亭神。

秋夜泊滸墅

歸心淹旅泊。何處近吳宮。夜色一村雨。秋聲兩岸蟲。道存衣食內。人老別離中。坐待巖關啓。松陵藉順風。

母壽日作

酉年季秋朔。阿母甲子周。黃花正被徑。紅穗初盈疇。采莢更釀麴。粲粲兼沈浮。良朋惠文綺。學子羅嘉羞。貧家不解音。亦召絲竹謳。貴以宣悅豫。暖響四座流。子婦前致詞。再拜奉縹甌。一願母常健。眠食安優游。二願歲常豐。春酒頗易求。慈顏笑爲醉。永永如今秋。

南湖秋望

幾點城隅接翅鴉。意行烏帽任敲斜。橫塘秋水明敲葉。老屋殘陽上蘚花。渺矣高鴻猶避弋。落然寒事又辭家。南湖多少閑風物。魚簞誰分一片沙。

同玉裁大宗集臯園

綠林暝堞境清佳。況復游從願不乖。人約寒雲來別浦。葉和流水出荒街。攜蔬風味追前輩。翦樹軒亭換

舊牌好敵玉湖諸勝蹟。他時睽隔憶青鞵。

玉裁來廣陵同宿閔廉風齋中卽事

比年還往數今年。乍到江城夜籥懸。地主能詩欣會宿。旅人貪話廢高眠。性疎我不王晞悔。才大君須杜老憐。除卻風沙鞍馬事。商量換得五湖船。

同作

歸安 姚世鈺 玉裁

客中對客互留連。竹屋青燈坐惘然。潦倒何堪中散病。飛揚空忝少陵篇。武林舊事銜杯問。漢上題襟對榻眠。不是良知心鄭重。幾曾輕喚渡江船。

正月十一日。同尺鳧功千。汎舟湖上。期敬身不至二首。以下庚戌

試燈天氣思無端。急喚扁舟破翠瀾。禁架梅花差少雨。吹噓柳色不多寒。空亭苔石週遭坐。新寺烟嵐上下看。欲借大癡哥鐵笛。一聲飛入水雲寬。黃子久逢吳子行。共吹鐵笛於孤山。笛聲不輟。交臂而去。見楊瑀山居新語。子久自號大癡哥。

處處梅開雪幾叢。蘇堤人立翠屏中。水邊歌鼓元宵近。詩裏光陰白髮公。將暖湖烟多晚碧。未花桃樹有春紅。憑誰爲報丁居士。落日沙頭悵望同。

過蘇耕餘教授齋賦贈

東南大藩地。郡學首古杭。層城闕禮殿。喬木森宮牆。石經有遺刻。奎畫宋上皇。七十二子像。擲自龍眠莊。

恍若過魯墟。聞金石絲簧。偏安蹟未泯。文治今光昌。侏侏九邑秀。橫經願知方。掌教匪得人。徒令糜官倉。
姚江蘇夫子。來繼徐大章。明洪武中天台徐一夔爲杭學教授有名射策驚漢廷。不得貢玉堂。翻然愛冷職。首藉春風香。健兒不敢窺。廟孺非牧場。元戎爲申誡。卓哉君子強。齋規胡安定。內行陳履常。經師與人師。一身兼所當。奉檄攝山長。臯比擁松岡。說士甘於肉。拔萃皆才良。易書校秋賦。暗中掇乘黃。十年冀北空。俊髦未易量。昨列五三人。堪充童子郎。佗時活國手。合在青衿行。居然老博士。豐頤垂鬢霜。竭來肯訪我。衝凍輿臺僵。勸我隨使車。登華覽咸陽。況聞主人賢。冰操出繡腸。方伯方公懿汀足以發幽憂。懷古多慨慷。鄙性慕棲逸。未獲辨蒲萑切鴻裝。開年曩舍靜。報謁因摳裳。清言忍遽別。竹影移繩牀。茗蔬趣留飲。牽迫辭舉觴。厚意使心醉。何必同渴羌。斯文準崔蔡。詎可窮公藏。想見尋道味。陳編誦琅琅。三閒屋打頭。俯仰寬八荒。從公樂乎此。莫嘆餅無糧。

二月十日同丁敬身金質甫陳江臯登寶石山天然圖畫閣
塔下樓開躡級登。東風聊憶昔游曾。春深城郭渾如畫。定裏鶯花不屬僧。人影漸移湖上柳。烟光又綠壁間藤。留題爲紀閑蹤跡。只有看山詫最能。

城南桃花同人分得流字

春江明白繞花流。十里晴嵐好放眸。紅豔正迷前代苑。亂霞微暎遠人舟。斜川朋好咸來集。杜曲風情不

自由願倩游絲千百尺。繫將西日駐城頭。

清明日城東顧氏莊看花分得耕字

惜春連日出重城。揀取花多任意行。姪姪臨波搖客釣。迷離並冢照農耕。活東聚處芹爭長。謝豹啼時筍盡生。將到薄游還小住。他鄉悶過幾清明。

四月十八日同人汎舟紅橋登平山堂送全紹衣入京

邗溝夏水漲。城陰積深翠。酒舫壓草痕。經年還一至。故人四明客。含香識名字。遠于京畿。含香未越。三國志虞仲翔傳注。太學待何蕃。少年推賈誼。合并有同岑。紮維情莫比。來聽郭公啼。暫爲鱒魚醉。人生赴功名。時乎偶然遂。壯觀留長吟。自足千古意。西上陟蜀岡。新亭亦佳致。歐公遺構在。清氣激松吹。歷茅司徒廟。眺謝司空寺。涼雲遞疎鐘。平楚碧無次。離愁生其閒。紛來不可避。惟願追前修。遠轡從此始。

五月十三日同丁敬身游智果寺

招得吟朋上釣槎。北山來訪野僧家。竹陰入寺綠無暑。荷葉繞門香勝花。泉酌參寥寒磬缺。字尋坡老壞梁斜。幽禽不會躊躇意。飛向湖天點落霞。

同作

錢唐丁敬身

偶停艇子叩虛寮。初見森森竹放梢。鳥語狎人渾不去。湖光似雪更難銷。名泉舊自高僧著。壞碣曾經

野火燒五月藕花思往句吟魂雖在倩誰招。

功千送高麗墨用山谷和文潛謝穆父贈松扇韻

樂浪松肪薄於紙。一挺崑崙指形似。若教持伴館中人。風鬢應寫嬋媛子。金蔡松年使高麗為館伎賦石州慢詞有雲海蓬萊風霧鬢

之句見劉敬身用山谷韻。乞高麗墨於功千。而墨僅二枚。一贈尺梟。一以贈僕。竟無以應也。次韻答之。僕亦

同作。

黑玉乾爻光印紙。柳枝瘦龍略相似。面作龍紋背有利見大人四字貢餘人手競分藏。主不吝留等窮子。城南居士氣高

寒。乞墨不乞錢買山。半枚莫得李公擇。置君且在廉讓閒。李公擇曾惠蘇子瞻墨半枚其印文曰張力剛云得之高麗使者出陸友仁墨史

和功千遺敬身流求扇以償高麗墨之請三用前韻

排日詩筒遞連紙。扇痕一握苞苴似也。知摺疊出鯤人。卻勝纖濃埽螺子。往作詩臞六月寒。船回落際來

閩山。動搖更想梅花手。可資談柄於林閒。流求女子多以墨割手背成梅花

原作

仁和趙昱功千

研光點漆可鏡紙。烏玉玦形毋乃似。松烟恨不貯三丸。餉供蠻牋寫丁子。科斗名丁子見埤雅敬身善作篆書幾日船趨

風吹寒。摺扇宛轉來中山。珠宮冷氣壓三伏。合置先生懷裏閒。

夏夜宿清隱菴五更汎舟湖中

禪榻安心午夜過。出門葭葦響微波。舟人喚起山月墮。權入藕花風露多。

秋夕

節近孟蘭暑漸平。雨過籬角豆花明。絡絲蟲響無燈坐。劣有幽懷待月生。

有懷玉裁授衣

我夢吳興好。看山兼著書。遠游成計左。歸去與人疎。水閣三閒隱。家風一曲漁。焉知陳正字。不共采秋蕖。

次韻同作

江都
閔華
廉風

絕席陳無已。閑居姚祕書。故人俱寂寞。芳訊漸生疎。蒼弁秋堪畫。玉湖清可漁。遙知兩詞客。搖艇入芙蕖。

聖因寺觀貫休畫十六羅漢

唐人畫十六羅漢。筆力獨數盧楞伽。休公後起出其上。真容應夢有似忽。現優曇花。小篆親題廣明歲。正在江陵傳絕藝。禪人請歸懷玉山。海衆林神盛訶衛。休公不樂依錢王。此畫何年流落長。明古寺青豆房。殿墜香斷印。龕冷燈無光。我昔借觀匿不出。卻恨俗僧皆啞羊。宰官移置湖上龍宮之寶地。應真一一來高堂。題詩記得歐陽炯。此畫依然神貌並。烟煤雖暗墨蹟麤。生絹開張氣疎挺。眼淨野鷺。肩削枯龜。頂峯

嶽嶽眉雪綏綏。彈舌呪罷蓮葉。鱗齒嚼徧楊枝。四十二章經在手。一百八顆珠倒垂。灌餅高擎裹鼻。坐具入定。搗瘦頤。聖賢自古秉異相。何況流沙印度相逢時。高情逸格寫不盡。更有噴如破賊三軍麾。其閒憩寂皆無語。巨石高松絡雲霧。中華只識諾矩羅。龍湫雁蕩經行多。嗚呼炯也詩。休公畫。同在人間縱瑰怪。我欲追扳力不能。但作低頭東野拜。聖因寺裏鳴粥魚。五雲長護先皇書。永將玉軸鎮孤嶼。請看水墨。已是七百春秋餘。

登虎阜小吳軒贈雪湖上人

劒失空池虎氣沈。全吳輸與客登臨。岳收鬼雨參差霧。樹簇人烟一半陰。齊女望餘橫古堞。越兵來處見飛禽。支公笑指黃雲壠。留看斜陽畫滲金。

小吳軒曉望用清遠道士韻

冷露響墜葉。殘星在秋漢。昨爲僧牀宿。避喧遠如竄。開牖發晨暎。絕奔寄奇翫。滄溟怳一漚。興欲游汗漫。藍霏吐近郭。素霧起遙岸。俯視平林梢。高下若濤亂。孤塔不受侵。猶羈七級半。須臾山帶接。變滅海市散。下方歌鐘地。醉夢屢失旦。豈知青岳端。有客早揮翰。逸想天雞語。幽共谷鳥歎。何當踵嘉游。清詞不能贊。

王蕝林司勳邀游惠山訪愚公谷四首

二泉亭下看詩牌。轉入蕭森秀嶂街。卻是舊游多鶴突。幾回孤負筍皮鞵。愚公谷左爲秀嶂街右爲名泉里。

前人卜築愛幽奇。疊石爲山勢若移。冷翠空烟吹不散。似和敗葉護荒池。

菟裘過眼卽滄桑。蝸雜苔痕上壞墻。誰見氍毹春月暖。聽歌人在蔚藍堂。

鄒愚公每挾青衣。度曲於此。

山圍屋角木陰欒。瀲灩春申溯響寒。我輩向耽荒率味。不須金粉畫闌干。

同秋玉佩兮西顯江臯自京口放船至焦山

焦山萬古色蒼翠。撐洪波。比年困行役。東望浮一羸。探奇藉良朋。不恨時蹉跎。江豚靜匿影。高檣指巖阿。竹樹漸可分。飛簷壓嵯峨。轉取寺後道。恐落千盤渦。滿載京口酒。吾面未敢酡。蓮須有淨界。佛事先羯磨。古殿陰不散。縣雲覆杪羅。化生欲震動。爲少人跡過。門橫象山碧。空水相蕩摩。衆謝迺獨往。悄然懷東坡。

三詔洞拜焦隱君像

呀然石房闢。枯柏互森竦。下有黃犢廬。山因姓氏重。炎靈失其馭。四海浩呼洶。先生獨緘口。絕世一何勇。魏吳公與卿。彌望盡闕茸。去之斯已而。孤寄此巖崕。入獸不亂羣。露寢甘自擁。至今拂巖花。真氣使人拱。何哉天書帝。禳祥共愆憑。通夢謬加封。高靈肯汗寵。祥符中。真宗臥疾。夢隱君而愈。詔封明應公。我疑駕蜚鴻。瑤草拾遺氄。爲

君迴俗駕。落葉寒到踵。

觀音巖次石壁上宋人趙冰壺韻

聞思大士蹟猶存。坐斷千巖水氣昏。徑滑行防和葉墜。江清汲愛帶雲吞。斑斑霜樹多棲鶴。裊裊風藤欲

挂猿行盡丹梯三十六。直疑高處見天根。

雙峯閣

絕磴盤空出。危峯架屋低。雲光在其下。帆影盡於西。身世浮杯似。年華過鳥齊。禪寮容自恣。筇杖約重攜。

別峯菴

平岡連筠杉。石棧下奔峭。幽林天光入。悽神歷衆妙。結茅但孤僧。啓戶延客眺。云此東峯半。微茫見海嶠。濤聲寒鼉答。烟色斷雁叫。浩劫水仙琴。長往任公釣。揮手謝時人。與爾不同調。

夜宿松寥閣用薩天錫韻

深松耿禪燈。江黑疑有雨。平生託宿處。奇勝此堪數。微聞金山鐘。漸辨瓜洲路。海色與西風。又將陳跡去。

瘞鶴銘

我生好讀浮丘經。焦山來訪瘞鶴銘。纍纍之冢令威歎。羽化誰使傳千齡。迺知仙家重文字。不異人世談幽局。崩崖鼓浪下無路。直待水縮霜霰零。墨痕濺面葉藉背。仰臥劣可摹真形。張王近事僧指說。張昭奇險欲動魚龍聽。長沙陳公鵬發天祕。抉取覆以屋建瓴。繕亭何必歷三癸。鑿石直疑煩五丁。上皇樵書今得覲。尤慮氈椎日敲擊。比量北海遇趙岐。特護翠珉藏複壁。敢辭米老河豚譏。賸本重鏤外加髻。篝燈側足窺大幽。彈渦親剔筆畫適。真官若掌女青律。筦牡失職當窮接。百番赫蹏走書估。三日臥看毋自苦。摩

準後此五百年。鋒稜就視空茫然。吁嗟神物非近翫。不如天吳什襲猶能全。

焦山古鼎

古之彝器篆最奧。佚籀已遠誰稽探。橫舟持刀或立旆。簡質妙若繪事妣。姬周尙文備衆體。款識不慮供魚鱣。二千年物落山寺。王詩大小傳東南。西樵阮亭茲游一見發絕詫。熊熊光溢燕子龕。腹深八寸層尺

兩先生

四叩之清越。微聲鏘雲雷。周市峙饕餮。生砂活翠浮朱藍。無專世惠釋文異。不獨立位形相參。邈父鄭邴

誤考据。尙功妖婦迷研覃。惟王酬庸錫册命。鑾旂鑿勒兼戈鏃。忠忱對揚懼隕越。孝思用享調滑甘。鈴山

不識此二字。廿年辛苦成虛談。天池釣竇假盜柄。大雞亦應台星三。明世宗自號天池釣鑄氣爲兵事豪

叟見沈虎臣野獲編

奪攸熹。一例如狼貪。上河圖子偶僞託。思質陷法人何堪。吉金肯冒辱金辱。得不昇送行趨趨。子孫永寶

意爾爾。雜廁尊勺娛宴酣。豈知袁州詔簿錄。清玩件繁文嘉譜。此鼎潛藏幸神助。同時輩行歸瞿曇。空諸所有乃常有。雲烟過眼休嘲哈。壑舟恐遭大力負。請視覆轍應懷慙。何如留與客吟賞。茶具更攜都統籃。

甘露寺

誤緣峭壁蘚痕滑。喜見空樓江影斜。留得唐朝衛公塔。廊腰雨過鐵生花。

同作

祁門
馬曰瑄 秋玉

斷甃猶存劫火銷。祇憑絕頂看金焦。我來十月霜風厲。江葉飄零似六朝。

海嶽菴

米老風流絕代無。一菴零落近僧廚。頻經甲子留京口。仍見寅哥列坐隅。卦影人閒求古像。研山壁上勒新圖。奇顛那復拘常格。佳句還堪壓萬夫。

游金山

渡頭晴色風帖然。行盡寺廊如有緣。江光四圍佛屋頂。洞雲幾片僧牀邊。開尊留客黑鹽豉。打槳載人紅板船。今夜蕪城定生夢。夢在聽潮軒裏眠。

十二月十七日雪後沙河寫望

野橋俯川光。微曛隱疎木。餘雪連半陰。遙山自相屬。透池人城隅。寒色翳空曲。離離被沙草。歷歷明村屋。應有林棲子。殘編時暎竹。烟水抱一灣。皓然行徑獨。明初馬仲禎卜築於此。名一灣。烟水止菴。祥公詩。占得沙河。水一灣。此身能與狎鷗閑。 窠閑魚不上。槽鳴酒初熟。毋憂世士知。清境非所逐。

人日集施竹田蘋香齋

以下辛亥

蜜炬紅銷漏下頻。非關豪飲擬陳遵。烟中春月大可愛。窗外梅花如故人。一種繁華武林事。百年珍重草堂身。幽坊莫忘重過約。周北張南只比鄰。

題華秋岳詩卷

我愛秋岳子。蕭寥烟鶴姿。自開方溜室。高詠游仙詩。雲壁可一往。風泉無四時。滄洲畫成趣。儻要故人知。

同江臯飲吳山酒樓懷亡友石貞石

春風勸客倒雞缸。樓子臨湖正背江。翠澈時時搖遠樹。晴嵐故故入西窗。二豪醉後知何物。此士塵中信少雙。石仲容今呼不起。與君狂語倩誰降。

古蕩舟中同大宗聖幾江臯探梅作

小船如瓜皮。可坐兼可眠。春山隨我行。澹翠何縣聯。竹外一雞唱。風氣太古前。搖搖四詩人。漾入梅花烟。

石八郎祠

薄暮投空山。春陰澹落日。躡躅樵逕旁。幽幽古祠出。畫壁綠颺颺。虛廊蔭杉漆。湍咽神絃停。嵐蒸廟額失。相傳石敢當。祈報據齒峯。但存天水志。名字惜遺佚。祠見咸澹臨安志竹枝迎村巫。梅花作靈匹。勿事呼林央。山岷保終吉。

晚至溪上巢

林巒生春寒。心在諸天暝。列坐疎竹根。微泉各爲聽。花光淡欲無。松籟遞相應。衝烟山鳥還。余亦下蘿徑。

汎舟河渚取道田閒尋梅花泉

清流一支瀉。漏影明朝暉。行行數石髮。捨舟在溪門。名泉如逸士。高寄梅花村。寓形本天趣。當得靜者論。

瑤席不盈尺。衍漾青絲蘊。馨沸素漚發。皎若飄英繁。徒供野人汲。彌思桑苧言。四山秀脈聚。萬古陰機翻。慰我斛茗瘳。甘芳入餅盆。潛分鈎突沫。高尋玉井源。

蘆菴贈克念上人

河渚富幽棲。迴復何窈窕。渚中復有渚。春淥滿四照。相期蘆之漪。禪客對清峭。示我戒中詩。別擬畫公調。因知彼上人。滅景自年少。晏坐觀物情。仁心憫漁釣。隔離聞櫂舟。帶雨見荷蓀。我來問佛事。指點梅花笑。

重過秋雪菴

僧言蘆花時
月汎最佳

魚國開雙林。我遊不厭屢。柳界護生堤。盡除網罟懼。登樓展四矚。惟有舟是路。羣山遠在南。如讓水回互。同行興彌深。蒹葭待秋素。欲驗溪僧言。孤槳盪寒兔。

春陰望西溪人家雲山梅竹互爲掩映

溪聲迤西流。寺橋扼其隘。分餘落麥田。綺秀渺方罫。行人越阡陌。春望怡我輩。皜皜遠梅林。暎山青隳曖。下有魚樵麋。竹樹互襟帶。炊烟化山雲。雲起半明晦。花源色不同。輞口境如在。悵矣懷閑居。悠然悟天繪。入花塢。遇雨度藕香。橋憩法楞菴。

瓦亭標路口。兩山夾嶽峯。重過二十年。望岫盟我心。密竹遠無極。微徑劣可尋。清霽晝常暗。況乃覆春霽。雨來法華頂。雲埋精進林。僧舍名度橋灑空灑。濃青集衣襟。忽逢惜筍僧。導入精舍深。杉檜鬱當戶。小閣相

窺臨幽涓落斷壁。交作微妙音。并無去家愁。去家日遠。雨聲之欲擁冰牀衾。始知淨名室。可以聽涔涔。

雨宿永興寺

山樓一燈寒。蕭寥送清響。暗生平地雲。溼墮幽蹊橡。遂成三宿桑。題壁記疇曩。安居遇多雨。佛說發精想。橫窗雙綠萼。交影入蒼茫。俱上跌對妙香裏。夢寐雜詠賞。隔屋喧春禽。明將進溪榜。

春社呈志局諸君

蹤跡今年定絮萍。叢書堆裏晝常局。分來竹葉社翁酒。開過梅花水部廳。在南吳越朋簪連俊彥。台明幽事寄圖經。紙田自笑多荒落。欲向山川更乞靈。

次韻

錢唐汪沆西韻

離合人生似水萍。相於官閣類巖扃。風催花信初歸樹。草接苔痕欲上廳。爲乞治龔傳社酒。未妨破睡補山經。先生自具編摩手。更與家江發秀靈。

蠶豆和朱稼翁

豆子酥含綠玉凝。江鄉風物最先稱。纒絲花外藍初重。戴勝聲中莢已登。竹塢流連燒筍客。石泉珍重試茶僧。清甘并欲題三絕。轆釜朝來思不勝。

雨中汎舟三潭同沈確士作

一雨湖山破清曉。雲外諸峯殊杳杳。問誰著眼到空濛。只有斜風吹白鳥。斜風忽斷穀文鋪。壞塔平林乍有無。濃拖高柳三升墨。亂打新荷萬斛珠。畫船低似荷花屋。瑟瑟梢梢閒蘆竹。可惜今宵五月寒。不同我友三潭宿。

同作

長洲 沈德潛 確士

雲移高峯峯不定。湖波過雨光逾淨。佳人髻髻洗鉛華。隔紗微窺晚妝靚。一枝柔攏蒼茫外。綠蓑青笠元真態。不遇南屏孫太初。枯禪瘦鶴誰同載。輕船準擬泊三潭。鷗鷺爲羣我最堪。聽罷晚鐘烟際宿。荷花深處夢江南。

送沈確士歸蘇州

滿天梅雨合思吳。早挂烟中十幅蒲。白髮定能爭席否。朱絃曾遇賞音無。人同樂圃文偏潔。宅近靈巖趣不孤。只恐鷗情成閒阻。五湖那復憶西湖。

湖上汎舟至壑菴

舊識林扉僻。蟬多不厭聽。訪僧無北磻。覓路是南屏。石帶殘雲潤。潭臨雜樹青。迴舟看坐處。巖壑晚冥冥。意林所藏宋徽宗鸚鵡圖同確士作

繁華如夢宣和事。仍在神霄自遊戲。誰傳真蹟落人間。鸚之鵲之妙無比。松枝浙浙墨鉞攢。一踏枝鳴二

墮地足鉤味啄定爭鬪。不然那得風毛墜。中間似欲助老拳。欲飛未飛張兩翅。晶瑩點漆活眼睛。徽宗畫禽鳥多
以漆點睛。卻含萬里龍沙淚。我聞物性不踰濟。竟遣蠻輿隨突騎。祇應回首媿此圖。難諭兩宮通問使。當
高出紙上。時迎駕教瑞禽。扇篋翔集香風深。五月五日工翦舌。學成言語知人心。貫京便佞等豢養。不止烏棲借上
林。天機寫肖能無誤。押字淋漓若垂露。洞庭詩客詩獨步。邀我聯吟重豪素。休比乾侯魯國謠。仍爲天水
王孫賦。

題三弟子山遺詩後 并序

予少遭孤露。弟僅六齡。零丁危苦。相依至今。凡二十一年。去年幸弟舉一子。今年十月十日。弟忽遭疾夭。
亡痛可言邪。檢故篋中。有手書雜藥方十數紙。後有庚戌除夕一絕句。弟素不能詩。其辭似工者。豈有夙
慧邪。第二句竟成劉希夷花落之讖。抑有物焉。以憑之邪。吁。可痛也。因忍淚成二十字題後。付孤姪輔收
藏。人逐殘燈滅。行留斷雁孤。年年盡夜。空有淚模糊。

庚戌除夕

鷓子山

已響千家竹。將殘一夜燈。不知窗外雪。漠漠硯池冰。

樊榭山房集卷第七

詩庚

酒蟹王子以下

草泥纔出海邊田。不共茶鑪煮碧泉。漁舍西風成昨夢。醉鄉清味破中堅。香留阜莢看燈夜。餅臥黃花小雪天。可惜老饕情思淺。只將一語爲君傳。

佩兮南齋觀倪元鎮贈郝伯盛靜寄軒詩真蹟次韻三首。

清詩隸畫遠人氣。展向晴窗半穗雲。卻憶當時郝處士。能將寸鐵壽斯文。夜雨菰蒲何處居。居然范綏配倪迂。憑將一語添書品。絕似寒花瘦鶴無。心跡渾如過臘僧。小軒幽對竹鬚髯。更分白石茶爲供。甘受人閒俗眼憎。

沈石田合子會詞真蹟次韻自署云倚翠生沈周

南渡荒王嗟鼎沸。一夕青燐生大內。舊院樓臺化菜畦。渡頭無復桃根妹。承平樂事百味盛。平聲春宵角勝張長檠。言情不用比紅句。紀事能工倚翠生。鐵面譏訶亦時有。我嘗解醒當以酒。可憐瘦硬相城書。卻寫柔詞傳士友。平章風月秦淮風。秦淮伎有私印曰同風月平章事見野獲編小軸歸君篋衍中。冰漸生硯霜侵戶。道眼澄觀本

無住。

朱碧山銀槎歌爲秋玉賦

詩人往者聚長安。好事曾聞孫退谷。銀槎酌客客作歌。想像無由能寓目。朱華玉名碧山字。至正年居魏塘里。一生良冶此僅傳。流落江南非偶爾。虛心斷節桑落貯。分得秋河好風露。開襟有客踞上頭。或云鑿空博望侯。手持支機石一片。張侯張侯吾所羨。卽時酒與身後名。何如黃姑渚畔長游衍。槎腹鏤詩句瀟灑。問津可惜無知者。摹形已奪晉丹青。操觚堪補元風雅。主人索我重作歌。愛之過於金叵羅。前宵偷兒肱其篋。免隨羽化神攜詞。翠壺插菊展重陽。半杯竟欲追渴羌。醉倒空齋月爲枕。夢向天孫乞餘錦。

題陳授衣閉門覓句圖

君如後山窮。取婦離鄉土。漫歌妾薄命。已見男當戶。吟榻秋風高。冥搜避童豎。詩成在何時。飢腸鳴卓午。

論詞絕句十二首

美人香草本離騷。俎豆青蓮尙未遙。頗愛花閒腸斷句。夜船吹笛雨瀟瀟。

張野柳卿子耆詞名枉並驅。格高韻勝屬西吳。可人風絮墮無影。低唱淺斟能道無。

鬼語分明愛賞多。小山小令擅清歌。世閒不少分襟處。月細風尖喚奈何。

賀梅子昔吳中住。一曲橫塘自往還。難會寂音尊者意。也將綺障學東山。
洪覺範有和賀方回青玉案詞極淺陋。

舊時月色最清妍。香影都從授簡傳。贈與小紅應不惜。賞音只有石湖仙。

頭白遺民涕不禁。補題風物在山陰。殘蟬身世香蓴興。一片冬青冢畔心。樂府補題一卷唐義士玉潛與焉。

玉田秀筆遡清空。淨洗花香意匠中。羨殺時人喚春水。源流故自寄閑翁。鄧牧心云張叔夏詞本其父寄閑翁翁名樞字斗南有作在周

草窗絕妙好詞中

中州樂府鑒裁別。畧仿蘇黃硬語爲。若向詞家論風雅。錦袍翻是讓吳兒。

送春苦調劉須溪。吟到壺秋羅志仁句絕奇。不讀鳳林書院體。豈知詞派有江西。元鳳林書院人三卷多江西人

寂寞湖山爾許時。近來傳唱六家詞。偶然燕語人無語。心折小長蘆釣師。朱竹垞檢討靜志居琴趣中語

閑情何礙寫雲藍。淡處翻濃我未諳。獨有藕漁工小令。不教賀老占江南。錫山殿中允蓀友秋水詞一卷

去上雙聲子細論。荆溪萬樹得專門。欲呼南渡諸公起。韻本重雕蓁斐軒。近時宜與萬紅友詞律殿去上二聲之辨本宋沈伯時樂府指

迷子曾見紹興二年刊葉斐軒詞林要韻一册分東紅邦陽等十九韻亦有上去入三聲作平聲者

題冒辟疆姬人金圓玉水墨秋葵圖。辟疆自題云余不能飲日看畫此花亦飲醇酒意也

金璣橫敲醉不勝。墨痕秋暈一匳冰。西園老盡佳公子。看畫花枝學信陵。

丁未暮春佩兮來游湖上。曾作五字詩奉贈。壬子秋僕至邗。留寓小玲瓏山館。歲晚將歸。復次前

韻志別兼呈令兄秋玉。

書至約已頻。別來思易積。夢想蜀岡青。中有春明宅。一舸秋雨餘。又逐閑鷗跡。相見尋古歡。前塵空役役。君家山館幽。短榻對虛白。名談開襟寬。積卷堆坐窄。琴清共低徊。酒釀小浮拍。殘年逼歸心。彌復惜離坼。今夕首扁舟。始覺身爲客。眷眷隔烟江。戍樓聞遠笛。

過青浦縣時將訪功千於松江

草草衝寒路。船窗西日餘。潮痕上城古。蟹穴入沙虛。飄蕩青龍艦。艱難黃耳書。故人今夕見。杯酒惜居諸。

朱涇

船子高風去不還。霜天如洗白鷗閑。明年若買蓑兼笠。合並華亭落照灣。

早春登孤山四照亭以下癸丑

澀磴盤迴竹尾斜。東風先入梵王家。吟筇更上梅多處。四照山光四照花。

南湖雨中

夾竹天桃醮小紅。水高魚渥沒蘆叢。南湖春物無人管。都付斜風細雨中。

虎丘清明同意林誠夫江臯作五首

年年水上送離鴻。每到清明憶夢中。何處天涯無草色。新烟偏繞舊吳宮。

春向通波盡可憐。賣花籬外鬪茶天。白堤無賴新楊柳。分上吳娘六柱船。吳中清明多以柳枝插船尾。六柱船見范成大吳郡志。

踏青羅襪逐時新。節物何關百感身。小住客程剛半日。虎丘山下看迎神。
千枝穠豔萬枝斜。破楚門西倚暮霞。不是逢春被花惱。卻因老大惜飛花。
柳傍蘇臺舞不休。山青無際水空流。歌船載取輕陰去。便有瀟瀟暮雨愁。

同作

仁和趙一清誠夫

春來到處觸閑情。小隊橫塘一字行。明日吳宮芳草路。青青踏徧又重生。

春晚同尺鳧西顯登丁家山新亭

百轉鶯闌百舌催。游人猶向此山來。雙亭半倚林蘿出。一壑中分紫翠開。
笑挽風光歸健筆。醉邀湖影入深杯。平生野服宜春服。惹得松花竹粉回。

立夏後二日同敬身授衣過重陽菴薛尊師房

有客佩含景。丹房迥在東。開窗俯塵世。坐樹御天風。白羽花間驥。青衣泉上童。
日長能省事。吹笛此山中。

南湖初夏四首

不踏看花陌上塵。草堂近卜約齋鄰。垂楊水寺殘碑在。瘦策寬鞵浴佛人。
委巷人歸路屈盤。苧衣初試尙嫌單。斜陽半落湖光裏。一陣蘋風助麥寒。
壞垣桃李自無蹤。記得輕船對罽泥。看到濃陰春又夏。人家斜倚采桑梯。

張功甫自號約齋

疎放都無客過存。五經籬外曲通村。紅薺十丈開還落。臥讀農書不出門。

官米

近日官倉米。如京積最高。廬陵價先踊。河內發猶勞。鼠盜難周防。鳩形詎徧叨。盈虛如可酌。估客集千艘。

汪積山招汎湖上觀荷分得于字

妙友閒何闊。相期逃暑途。滌盜作茶會。刺船暎菰蒲。各各脫藤帽。一笑歡莫逾。羣峯正清曉。雲影移浮圖。趁此萬斛涼。搖入碧玉壺。舟人頗解事。爲擇最勝區。虛亭架水中。水花下開敷。倚闌當花上。圓葉交撐扶。卻羨雙蜻蜓。翾飛抱黃須。縱目浦樹密。傾耳村蟬孤。諸公惜永日。迴繞穿裏湖。裏湖花更多。十里無處無。中央通延緣。魚翠時相呼。忽驚山倒浸。花底烟平鋪。安得山雨來。衆綠爭跳珠。遠香送清苦。悟賞知非殊。僧榻借偃仰。高唱紛喁于。毋爲待西風。空令芳意徂。

夏夜同巒城功千步月南湖

披衣聞剝啄。蕭散步城隈。煩思臨湖盡。幽襟爲月開。魚聲不知處。荷氣偶然來。莫怪無看待。清光送客回。

七夕苦熱效西崑體

星期經歲思悠悠。此夕星期暑未收。鸞影周旋秦女扇。蛛絲辛苦漢家樓。漸臺露淺移東足。銀浦風微到上頭。共道天人能會合。癡兒揮汗拜牽牛。

早秋同王麀徵汪西顯符聖幾坐報國院池上

秋意落僧院。行徑紆且微。愛此淇淇水。脩林隱炎暉。廢壑寒瓜蔓。古堞高天圍。清蔭漸半池。儵魚如有歸。盈耳發竿籟。長風本無機。一一適吾願。詎似身世違。永日敷坐具。無人挂浴衣。冷絕白鳥營。閑免蒼蠅譏。祇應二三子。勿歎知音希。

贈葭白移家真州三首

已厭譁囂學靜便。帛槌茶磨上江船。想君小閣移帆影。新占長蘆寺外天。

日出烟銷窈窕中。漁娃尙臥荻花風。淮南近日無三士。賸把江山乞寓公。

溧熙間。淮有三士。舒州張用晦和州張晉卿。真州章冠之也。見

張荃翁
贛耳集。

白鳥飛邊天鏡開。秦淮欲渡小裴回。不須折柬更招我。春水方生乘興來。

中秋夜廣陵看山樓對月

連宵積雨卷滂沱。洗出秋容與素娥。淮海東來寒一點。闌干下視眇層波。細尋桂子鄉關遠。苦戀簫聲夜思多。賴有主人能酌客。肯教邀影對紅螺。

晚秋夜雨有懷故園

落葉卷風雨。客愁仍去年。背燈三峽水。敲枕九江船。預想他時話。須妨此夕眠。南湖烟翠色。應溼草堂前。

哭吳尺鳧并序

八月三日與尺鳧飲湖上來廣陵兩月遽聞尺鳧凶問僕性寡交游里中二三故人相周旋學積行修意氣高爽如尺鳧者何可多得竟連蹇不遇以死晚年頗耽琢小詞以僕爲能賞音今無春風之筆矣十月晦夜夢尺鳧手一牋相示如生平覺而爲詩哭之

文陣推排歲屢遷蕭閑臺遠便登仙秋湖小醉無期別老筆新詞後世傳公等莫追王武子夢來猶見石延年平生一掬知交淚斗酒相和滴到泉

題姚玉裁夜雨圖爲悼令弟炳衡作也

剛風吹過玉成塵我亦披圖恨轉新今夜西堂打窗雨雨聲難寄夜臺人

予弟子山歿亦二年

哭沈欒城

客從蒲坂鬢先雕幾日神游向沆寥廿載交情蘭韻在一生文采玉塵銷真成方相煩君到定復巫陽不下招誰遣斯人竟黄土山風悽唳葬時簫

今年夏同君及功千意林早出錢唐門道逢喪車衆隨其後君獨徘徊不前若畏懼者執意其爲先兆也故有第五句

法雲寺銀杏詩并序

寺在揚州市闔閭極卑隘訪謝公手植雙檜已不存塔前有銀杏一本其大蔽牛腹穿裂呀然窺天禿枝攢擎榮悴相半殆唐宋來近千年物也此寺唐末楊行密曾屯兵宋又爲呂惠卿宅行密羣盜之雄固不

足道。惠卿以熙寧法禍天下。其人中與謝公爲役。亦樹之辱也。

不見龍鱗近佛香。猶存鴨腳覆僧廊。十圍空洞潛魍魅。雙幹生枯飽雪霜。影小吳王曾縶馬。涼多吉甫定移牀。孤根已是千年後。悵悵無人比召棠。

歲暮自題南湖所居四首

巢居何地可高鶩。近水聊同離垢園。寒淨綠蕪侵巷尾。明涵疎樹照城根。雲帆引我遄歸興。雪履聞誰獨往言。魚計茶經無外事。太平時節在衡門。

三間老屋打頭低。安隱深冬類蟄棲。短布自遮周伯況。大船不識庾安西。雨多夾雪添湖水。凍後烘晴滑徑泥。俯仰懷人千古意。密梅花發竊黃啼。

又向張園挹早春。豪華舊事久飛塵。石殘甲乙黏乾蘚。檻易庚辛積冷蘋。佛粥近分林下寺。竈錫新賣水邊人。賞心是物關時令。只以康強祝老親。

聊悅吾生未有涯。須煩健步遠移花。平臨列岫人烟小。細讀殘碑日影斜。臥架少書思閱市。行滕無夢到乘車。詩壇不似麒麟閣。敢並南湖上將家。楊誠齋詩。新拜南湖爲上將。謂張功父也。

北郭舟中同丁敬身汪西顯王麀徵作以下甲寅

扁舟望臯亭。淺絳色漸分。回首稽留山。餘雪黏空雲。迺知向背殊。諸峯若離羣。松陰結春靄。冷趣彌氛氲。

同游得三子。勇若張吾軍。遙拜杜子恭。棲隱尊昔聞。不測古人意。豈異今所云。清言各未已。村鐘殷微曛。
石鼓亭

石鼓本無聲。桐魚擊有異。名亭自何年。墜響闕山翠。拊牀惜典午。鼓妖亦此類。茂先如可呼。博物有遺議。
吳年出石璽。奇事與之二。維舟陟隕岸。將老纔一至。

宿佛日淨慧寺

羣山春未動。清刻出松篠。黃鶴翩欲下。引我步深窅。僧廬闢廣場。瀟朴境無擾。衣傳四明來。蔬足千指了。
平生參諸方。僻近苦未曉。今諳困學公。篆路盡縈繞。鮮于伯機游記云。村路詩曲。如行香篆中。夜深龕燈短。雪滴林月小。哦詩祛眼食。列坐至啼鳥。

曉起徹上人導行黃鶴峯下。觀龍藏泉。遂尋龍洞。至仙姑洞。

清鳴升峯罅。粥鼓已絕統。石盆分類泉。影動青菌菴。主僧爲前導。矜客富奇覽。岳痕蜿蜒臥。巧若出鬼鑿。
湫流苔礫度。陰洞松雪揜。華蓋滑可捫。神寰垢自膽。仙姑巢其上。側足覩幽密。重扉蓄內景。鴻瓏古誰撼。
既訝碧鰲蛻。復隱紺髮髯。出險翮所能。臨深謂何敢。冷風回人衣。歸路有梅糝。

洪襄惠公園中峯古歌

在錢唐西溪

苔梯不埽狐狸迹。崩雲上壓三十尺。東風一夜聞履綦。橫出殘梅點明燼。當日園開迎貴塔。仇大鑿春池

照珠翠。咸寧侯印竟墮地。七兒爭妍猶擁髻。金閨妖血無人見。塞上燕支洗羅薦。二百年來如抹電。蒼石無言淚如霰。

二月十七日雨中湖上二首

催花應不爲花愁。點滴疎篷喚出游。太半春雲如夢裏。尋詩人倚十三樓。著意船頭溼酥雨。生情柳外埽殘寒。春懷酒病依稀在。真箇花如老眼看。

自石湖至橫塘二首

楞伽山頂溼雲堆。噤瘁桃花出廢臺。萬頃吳波搖積翠。春寒來似越兵來。青山斷處水連村。踏草無人見履痕。爲愛橫堂名字好。夢腸他日繞吳門。

游鶴林寺

江村近寒食。花柳發天慳。舟噎荒城下。輿鳴野水灣。曉餅劉帝井。午磬戴公山。欲問千年事。高僧但掩關。

廣陵城南看花作

一灣碧水疎籬護。今人栽花昔人墓。今人又作墓中人。惟有花開客來去。

夏五雨後同意林登隱几山樓望江湖諸山懷功千游華亭

密樹含餘清。平池帶微溽。是時積雨斷。何以敞心目。高哉君家樓。脩楯俯萬屋。翳窗新桐枝。爲我翦蒼玉。

寫下數歸雲。眉閒攬衆綠。正爾山氣佳。散作風肅肅。頽陽在衣袂。幽鳥亦相逐。同心念薄游。雕章慰負獨。停琴味幽蘭。呼茗煮溪淥。遙知孤吟人。草蟲入明燭。

病痞少閒西顯聖幾見訪

日長一鬼欲銷除。倦倚屏風獨枕書。老去故人多已逝。病來學侶未全疎。香芸有味求公是。絲竹多慙薦子虛。何似南湖堪坐夏。白荷花底數游魚。

新安吳東巖孫婦朱孺人殉節詩

問政山高雲纒纒。瑤姬夜躡青鸞尾。竹陰黯澹桂魄香。左挹湘娥右山鬼。欲滅不滅深屏燈。朝來炎赫如懷冰。爲郎無計挽白日。妾命畢以朱絲繩。郎家閨門若朝典。一杯薑橘靈車餞。誰知泉穴百年同。不道歡言當日淺。祖翁聞之泣且驚。鉅篇上媿劉更生。東巖爲作傳我爲作歌少塵土。滌筆新安江水清。

七夕後一日湖上雨後作

客攜河朔杯。邀我汎湖水。蕩舟荷花中。山雲忽樓起。隔花聞龍腥。蒼茫不辨咫。驚雷殷空曲。驅雨入城市。風迴白苧薄。天開青柳靡。餘飄灑平波。劣見溼沙觜。勇退熱屬斂。戰勝金神喜。差強丈八溝。目無貴公子。病中承功千。以佳鼓滿器。見餉遂進淖糜。率裁小詩報。既

毘邪口醜欲談空。幽豆提攜裹飯同。不學南朝王散騎。但和薑蒜挂屏風。

舟泊平望懷王載揚客都下

平望亭前落照紅。十年幾度繫孤篷。湖田芋熟連朝雨。水國鱸香大段風。泊宅荒村無釣竇。泊宅村在平望震澤間。乃張志和所居。耕閑舊里有吟翁。孫銳字穎叔號耕閑。宋末隱居平望。有詩集。六街塵土流連處。曾否吳歛入夢中。

送沈丈樗崖游漢陽

長歌行色健頭白。此揚舲江落小孤秀。天寒大別青囊中。名畫錄槎上老人星。歸去書能寄。餐松對敬亭。

小玲瓏山館月夜答方右將見懷

寒征背旅雁。飛帆越江潯。寂寥閉山館。遙夜何幽森。微月澹絕壁。淒烟冒疎林。登高眺平楚。霜氣皓盈襟。迴燈理故書。忽見瑤華音。攄情一何厚。鳴謙已而深。報無飛霞佩。祇枉秋水心。夫君抗高步。浮丘當可尋。好修永自茲。豈慮年鬢侵。蹇予風塵際。行役懷欽欽。重城隔閭巷。今夕如孤禽。矧復千里遠。離思紛難任。對酒不能飲。直爲君沈吟。

過小玲瓏山館。有懷樊榭。用張司業寄韓昌黎韻。

歙縣方士廋右將

頑鈍苦檢束。薄俗恣便安。當前昧矜式。頓失心志閑。繫我有良朋。朗潤雙璧連。謂嶠谷牛棧。駕言適虛館。爰憩玲瓏山。古翠羅峭壁。榮木蛻高蟬。南風一披拂。盪滌襟懷煩。游目騁吳越。浩渺烟雲閒。念彼秋水人。宛若珠在盤。憶昨誦佳句。導我百尺竿。今茲苦離索。雖美誰爲前。何當過江來。把臂期晤言。

揚州新構梅花書院紀事二十韻爲秋玉賦

即梅花嶺舊址

一簣前朝築。層臺久已傾。榛芴誰剪薶。堂廡忽崢嶸。斷手由耆舊。同心快落成。喬林書閣迴。疎影墨池橫。帶草綠文砌。衣魚走旅楹。人來石倉學。地勝月泉名。都講堪重席。高材自短檠。俗將歌吹易。氣以莖蘭更。白雁江南識。紅羊宋室平。雙忠同抗節。百戰力嬰城。純孝維桑重。天恩綽楔旌。庭闈因愈疾。笄幘獨懷清。血盡棲魂館。野日樓魂之館。出沈亞之集。風纏託體瑩。異時齊俎豆。列屋若宗祊。書院之左。祀宋制置使李公庭芝。副都統姜公才。右祀本朝蕭孝子日曠。始作圖經記。媿修月旦評。功逾文太守。頌徧魯諸生。丹牖期千禩。青鞵訪二巖。無忘等嘉樹。有道補由庚。爲約春初霽。還尋郭外行。仍持無算爵。共聽栗留鳴。

金壽門有犬名曰小鷓要予賦長歌

高人寓物意本廉。祝雞抱犢初無厭。要與衆嗜相鍼砭。何來小犬暫且黔。細骸茸尾厥喙尖。美淨不使塵泥霑。似舐丹鼎垂瓊飴。碧桃花下瑤草醲。仙姝門戶防俗覘。一聲吠上金背蟾。何人盜取歸重欄。先生得之笑娑姍。勝聘狸奴裹吳鹽。練香熏透毛鬚鬚。字以宋產辭頗謙。畫筒書櫃伺守嚴。虹月舟載僧廬淹。昏鐘幾杵霜氣銛。黹炭火爐雪一杓。讀倦抱汝寒無嫌。主人齋盃芹苴醃。飯餘分供味亦甜。魚砧饒沫休重拈。風人田車詠載獫。下彬險出決錄槩。烏龍錦茵羨香簫。冬郎妒媒語詹詹。一時豪豔誠難兼。愛才蕭僕得汝添。絳繒不逐高門炎。邊鸞爲君拂新練。邊頭公下視李迪筆勢纖。低頭欲入衣襟襜。歸來濤江臥茅苫。

越山鈿朵青刺簾。手栽花護娛老顰。雪麋名共縹囊籤。張伯雨還錢唐詩。雪麋應護手。栽花自注。雪麋元洲犬名也。

冬日馬秋玉佩兮。招同葭白。被江壽門。廉風西顛。江臯集小玲瓏山館限韻。時子與西顛江臯將

還武林。

誰道天涯樂飲仍。清冬無事集吟朋。留歡短日侵簾額。隔坐疎枝並石棱。鄉思酒邊懷越酒。舊聞燈下話包燈。物華兩地牽人夢。多媿離騷語斲冰。明季廣陵包壯行製燈有名號包燈。

同作

錢唐金 農齋門

少游兄弟性相仍。石屋宜招世外朋。萬翠竹深非俗籟。一圭山遠見孤棱。酒闌遽作將歸雁。月好爭如無盡燈。尙與梅花有良約。香黏瑤席嚼春冰。

臘日同周少穆汎湖

殘年風景得重經。更借湖波倒玉餅。寺鼓漸催沙草動。船窗纔放雪峯青。酒壚泉下無消息。舊曲尊前有典型。舉似梅花知此意。冰澌苔澀上空亭。時尺覺樂城俱下世

西溪曉起以下乙卯

首春溪中寒。偃臥如屈鐵。宵分天柱夢。覺來轉清切。開門殘月在。下見數峯雪。雪際生白雲。宵暎不可說。登橋水市靜。尋徑冰泉裂。田翁尙無事。初陽候林缺。懷新意似欣。理舊抱已結。何如巖棲人。蕪竹飯松屑。

行田至荆山嶺下作

大山何連延，細岑若迴顧。中有微徑通，兩村隔松霧。平疇開朝日，宿麥半凝沍。雲根脈未洩，涓流但微注。野人籬落小，鳴雞隱雜樹。雖無汜勝書，農話眷幽素。稍營下澗業，更羨上澗住。竹橋滑春霜，往來定非誤。

庭梅二月朔始花

牆陰的的兩三枝，風信纔臨暝色遲。可是春人易惆悵，疎花明月不同時。

臯亭看桃花舟中同孫瑤圃右階作

輕陰只傍北山阿，游舫招要此再過。十里風寒花淡淡，滿塘春碧水羅羅。不逢漁子應迷路，喜有詞人共踏莎。韶景依然年少去，手中芳醞正須多。

吳興月河雜題五首

炊黍重來負景光，南風草木有餘香。臨湖門外舟如葉，看盡青蘆十里長。溪閣誰家有笛聲，釣游無處不關情。水雲寥落暮天出，青翠數峯城上明。

菱絲荷葉到塔除，頗羨才人此卜居。慙媿月河爲寓客，所聞前事不勝書。

月河所聞一卷，宋吳興莫君陳撰。

隔溪燈火晚冥濛，留客空齋賭酒筒。鄭重陸家兄弟意，夜涼笑語水光中。

謂姚玉裁，蘭成。

燕燕交飛鴨鴨喧，沿波思與故人言。陳郎授衣賓榻知無暇，安得往來楊柳門。

鮑西岡明府罷官後十二年復來宰長興頃從授衣處讀其詩集作此奉懷

憶昔共年少論詩官閣曾赤衣今日盡白髮再來增會面山雲隔彈琴溪月仍他時傳俊逸爭號鮑長興

唐改堂使君索和元日之作

夢覺鈴齋冷絮顛早分春到使君前朝正尚憶蓬山直課績應同韻海傳官瓊嘗茶民事簡農家探繭物華妍楊亭謝館追遺蹟黃閣遲登爾許年

閩四月二十一日集竹墩積照堂聯句用顏魯公石尊聯句韻

閩夏集嘉客凤起羅清尊沈綸翁樹本一郡山水古百年蒼舊存鷗蘆深刺船影竹密拍橋痕杭大宗世駿乾鵲噪

老屋長蛟垂前軒沈東甫樹本竟然笠屐到宛爾昆友敦沈釋旂樹本棄捐薄俗禮往復同心言沈幼牧樹本茵溷各安

遇蘭艾紛殊根樹本文纒藉貞玉白水寒芳蓀鷗戀三宿桑下留十日平原世駿浪浪雨鳴瓦滾滾雲出門樹本

急擬括羽似細並飛絲論樹本陰機幹溟滓神化合混元樹本烟駕不肯駐日車豈愁翻樹本林滋梅磊落溪暖

萍温暉鷗積靄斂萬象大聲廢羣喧世駿攬金協至聽漱玉清營魂樹本連蜷蕉心展麗覲桐花繁樹本衣徽那

可攬琴潤誰能援樹本飄搖狎鷗鷺滂沱沐乾坤樹本談豪袂時奮坐久燭屢捫鷗筆陣儼魚麗酒兵猶蜂屯

駿韻艱困師服辭聘追文園樹本天骨森萃尊健格超籬樊樹本詩鵠設三乏義途馳兩轡樹本上下騷雅際湖

沿清濁源樹本寂憩蛤吠野倦欠雞號村鷗翳岑俟景霽吐溜蒙霾昏世駿渴畏茗匳盡夢欣香鉢温樹本吾儕

意氣合。繾繾非懷恩。炳巽

題敬身所藏宋石刻劉商觀奕圖拓本次沈啓南韻

翰墨能齊張瓌名。又從摹勒見圓成。拓輕蟬翼渾相似。筆細蠶絲不敢爭。殘楮人閒無二本。一枰松下有長生。綠陰茗會清江上。展向晴窗眼倍明。

八月四日同沈釋旃幼牧汎舟後莊漾游上金寺

西風卷天雲。水物覽澄霽。輕舟屢敲側。秋渚轉迢遰。菱絲冑波鏡。柳影出峯髻。漁情滿蒹葭。詩思落空翠。向來境已遷。弭楫到初地。寂寂蓮宮開。陰陰松子墜。靜息僧禰喧。古見佛傘毀。尋澗咽復流。披篋亂無次。虛曠絕塵機。颯沓驚涼吹。將還重裴回。落日在巖際。

下菰城

古城並青山。鳥鳥噪城上。蘿侵女牆平。竹惡樵路妨。緣岡陟嶮危。髣髴門有闕。其中復何見。飛蓋隨風颺。涼雲墮層阿。林莽時一漲。我聞春申君。井邑此焉訪。絕秦思重閉。相楚取大壯。遺功猶堅完。故壘屹相向。千秋同屈指。事往祇惆悵。

游菁山常照寺

余生嗜幽討。輕身藉孤筇。矧此吳西山。歷歷青芙蓉。古戍殘壁在。小市樵人逢。悠然無盡意。一徑緣風松。

同行二沈子。妙語時相供。稻塍度斜日。預想聞疎春。到門湖響合。深殿香烟封。碑鑄嘉泰牒。活筆猶鸞龍。追惟翺始年。高僧隆茂宗。畫充內供奉。天笑朝從容。携蒲襲蜀錦。煥儼紅樓蹤。癸辛雜識。思陵御府。身向空谷。說法鳴霜鐘。若人悟懸解。了非罣礙曾。閱世如浮囊。誓願棲雲峯。我來思展禮。登臨悵何從。傑閣聳遺構。網戶光彤彤。涌地憑佛力。鬼瞰難爲凶。寺後高閣。明時自范祭酒應期家移建。四周碧玉椽。夏磨晴翠濃。太息萬緣幻。轉向世諦慵。矯首窅塔波。卓筆深林重。

沈襄敏公東涼山別墅晚眺

中田一拳碧。落景淒百卉。亭館野僧居。彫剝今餘幾。廢池浴獨鶴。亂藤嘯山鬼。堂堂太傅公。平蠻功最偉。雲霄史臣筆。風雨羣小誹。至今行樂地。草木衆猶隄。相攜到來孫。清論翻有斐。晚風吹漁歌。秋入西塞尾。倪文節公經鉏堂雜志云。下菰菁山之閒。一帶遠山爲西塞山。

雨中舟過衡山漾

竹溪止三宿。流連極文讌。遂爲郡中行。解纜疎雨濺。芳尊惜墜歡。澤國起遙眇。沿洄舟轉滯。風逆如激箭。出浦卽通川。川光遞隱見。白雲被青嶂。彌望鋪組練。居民非楚俗。商氣滿吳甸。誰能生古愁。坐令齒髮變。
晚霽登峴山寄吳丈琳巖

蒼巘際遙汀。歸雲不復吐。乘興事攀躋。一一辨村塢。去鳥淨華雯。來帆出疎樹。伊人渺何在。咫尺隔前浦。

空亭瓦影落荒碑。蘚痕聚。斟酌千載心。石尊貯秋雨。

中秋月夜吳興城南鮑氏溪樓作

銀雲洗鷗波。月出玉湖口。照此樓下溪。交影臥槐柳。圓輝動上下。素氣浮左右。坐遲月入樓。寂寂人定後。衰回委枕簟。窈窕穿戶牖。言念嬋媛子。牽蘿凝竚久。納用沈郎錢。笑沽烏氏酒。白蘋張佳期。彤管勞摻手。乘月下汀洲。遙山半銜斗。明當渡江時。復別溪中窈。

正月十九日探梅入龍歸塢。晡至西溪。

以下丙辰

辭舟理輕策。高處望溪源。日落泉明滅。山空氣晏溫。亂疑雲滃竹。香訝雪分村。欲就梅花宿。春風爲埽門。春晴登吳山。同竹田江臯。西顯聖幾作。

振衣仍得躡芳塵。追逐風光似有因。燈市乍收三日雨。酒樓遠接一湖春。山王不入林中詠。陶謝居然我輩人。誰賞鈿車來往路。落梅如雪撲吟身。

鬻書和沈峙公

收處心常損。拈來淚欲垂。誰憐非長物。竟遣易晨炊。宿讀人難得。長貧我自知。祇愁肉食者。還有鬼名嘔。

南史。人勸柳津聚。書答曰。吾嘗請道士上章驅鬼。安用此鬼名邪。

西湖柳枝詞六首

相識東風萬萬條。冶游付與玉驄驕。等閒回首情難盡。行過長橋更短橋。
藏鴉門外綠情悵。染雨烘晴色漸深。底事錢唐蘓小小。不將翠帶結同心。
千絲踈地復臨湖。記得年時賣酒壚。惟有箇儂偏愛惜。三眠還要倩人扶。
芳草春來斷客魂。楊枝只合伴桃根。滿湖碧水游船散。西月東風在寺門。
鬪盡纖腰一兩枝。水仙王廟日斜時。青青不許游人折。細葉如顰更泥誰。
路旁烟態冒朱樓。長送行人千里游。願作湧金門外樹。生來渾不識離愁。

趙忠毅公鐵如意歌

上有銀鐵銘云。其鉤無饑。廉而不凋。以歌以舞。以弗。若是折唯君子之器也。趙南星。凡小篆二十六字。

鐵花鏽澀尺有咫。一朵冷雲吹不起。四周銀鏤篆畫嚴。古器曾經近君子。高邑趙公卓犖才。東林黨籍標渠魁。要扶衆正黜羣小。不悟晚乃爲身災。高皇辛苦營九有。輕擲乾坤崔魏手。椽人假子滿朝廷。豈獨見泉竟無後。見泉無後。趙公目南樂魏廣微語。見泉廣微父允貞號也。廷推禍伏三案根。遙遣荷戈出雁門。匹如祥麈在苑囿。獬豸構杌驅之奔。擊壺歌罷提攜舞。北闕關心淚如雨。恨不親將逆豎頭。碎如王氏珊瑚樹。力疏四害論四凶。公於神宗朝爲選郎。上四大害疏。光宗朝爲總憲。斥元詩教。趙興邦官應辰。吳亮嗣著四凶論。願鑄禹鼎代天功。人閒萬事不如意。佳名真與奇觚同。鐵兮何清寒。乃是公之忠義肝。鐵兮何突兀。乃是公之戍死骨。我購得此常賣家。傳觀四座寂不譁。若采銘文備史事。流傳億代可以箴官邪。

飲城東許氏水軒二首

主人高閣外。野趣一區寬。細草漸瀟徑。春波屈曲闌。拈舟無不可。命屐此來看。商略吹花雨。幽懷禁薄寒。年年行樂意。人事每相違。畫角高城動。梨花薄暮飛。真成客不速。猶道醉無歸。歸路惜分手。殘陽在袂衣。

七月十五日夜宿羊流店望徂徠山同功千作

圓月出蒼莽。涼風生樹閒。流光滿空際。西照徂徠山。越客寫鞍罷。魯人炊黍閑。因之惜清景。露坐話鄉關。

白溝河懷古次璧閒韻

一片塵沙閱世餘。薊門烟樹望如初。茫茫古道聞葢語。寂寂荒村上蟹胥。奪取瓦橋周業盡。畫成帶水宋謀疎。紫蒙何處秋風館。戴斗空傳奉使書。

十月十三日接葉亭留別金繪卣金壽門符幼魯全紹衣王載揚申及甫汪西顯

醪飲非關醉。浩然吟復吟。客心如落葉。遙夜感羈禽。文史耕漁用。春秋保社尋。明朝驢券後。一幅寫寒林。

歲暮行答蔣丈雪樵

歲暮矣。百工休。幽人閉門清似水。無錢何處貰芳尊。有鳥多情啣梅蕊。忽傳白髮杜陵空。落手長歌在連紙。自言賦命坐天窮。爲灾頃遇吳回氏。三閭老屋付無何。數篋殘書嗟已矣。且須逃債類謬臺。只合忍飢如甫里。蕭條身事集闌年。欲喚奴星行且止。我棲山澤久沈冥。卻因公府相料理。邪厭爭笑伯龍癡。漫

浪翻成司馬悔。歸來時序已趨趨。跌宕依然向文史。良辰相與撰逍遙。剛卯旋看書殼改。叟今有道能不憂。藥賣伯休聊爾耳。明朝三徑轉春風。連襪追游從此始。

樊榭山房集卷第八

詩辛

施竹田移居丁巳

後洋街畔城西隅。客來愛君屋上烏。清涼居士跨驢處。君今寫入移居圖。妻孥絕類楊通老。板輿況有白髮扶。人生鄉里聊自足。勝彼蓬轉無根株。東風吹換幾甲第。玉川破屋天壤俱。石香詠室是新署。有待花藥流芬敷。青山一桁出埤塊。數步卽瞰錢唐湖。開年殘臘景相接。大篇小句如聯珠。祭竈請鄰亦不惡。載鷗迎富誠何須。迎富事見廣川畫跋春宵得酒更招我。牆腰淡月吟模糊。

二月一日汎舟西溪

孤游避妍晴。入艇極淒冷。滿空春雲生。冥冥垂半嶺。花村下微叢。歷亂不復整。蝨綠出溪口。始見一峯影。犬吠暮烟中。似宿武陵境。懷我同心人。燈青曙耿耿。

入河渚泊古梅花下

春水何緩緩。入浦挈音徐。隔林度山雪。陰雲晦潭虛。搖颺不逢人。幾曲心悄如。著船梅花根。厓冷苔痕餘。脩篁暎寒色。紛然月生初。鄰鄰影欲流。曠望通前渠。忘言寄物外。獨往仍相於。日夕風更起。髣髴攬我裾。

新霽自安樂山至秦亭山道中作

肩輿雖勞人。幽尋息吾趾。還如履白雲。橫度青嶂裏。一里一褰回。林鳥哢遲晷。稍稍數家村。剡桑課春事。塵網幸見疎。吾土兼信美。野風香落梅。深竹照流水。昨來忽晴陰。浮生正如此。猶持入山心。邈地向城市。昔年曾記共清歡。水國樓臺入夏寒。好事故人分茗供。高情太守借山看。過橋樹色濃於畫。掠艇溪光染未乾。安得與君常泊宅。更無塵土汙毫端。

同作

錢唐陳章授衣

春風陳迹已漫漫。爲話蘋香憶碧瀾。四月桑陰門巷綠。半城溪色市橋寒。老漁舉網銀刀出。少婦繰絲雪繭殘。果有心期不相負。三閒水閣未應難。

四月十一日客廣陵秋玉佩兮招予同爲京口之游晚雨泊舟入高旻寺

龍宮晚沈沈。天人衛庭戶。清冷七葉林。幾點摩羅雨。門前爲通津。方袍自安處。孤塔倒池深。定禽隱花聚。采真具扁舟。信步皆淨土。睟容睇如空。心叩寂寞取。

曉霽出江口望五州山

夷猶方舟發。曉色江上微。初識五州山。向來知是非。洩雲獨未斂。淪波若無依。連林翳更吐。秀岑覲復違。

徐聞風荻偃。氛淨浮陽暉。淹留惜去櫂。賞此忘朝飢。褰裳願既謬。尋烟跡亦希。偕我漁釣侶。眷言翦荷衣。

重游焦山信宿石壁菴二首

神山眇何許。欲往不可求。焦公棲隱處。溯沿成後游。衆木生夏寒。絕壁銜僧樓。綠陰下無地。江影如雕鏤。移來天外帆。森島胡豆洲。一窗納萬里。波遠斜陽收。禁足花幢古。攝衣篠塢幽。他時風雨至。或見飛龍秋。成連去我久。清興窈如昨。來逢海月明。遂踐攜琴約。淙淙水鳴絃。心手兩無著。餘音入風林。坐使衣裳薄。夜分江瑟瑟。古調久不作。行將徧名山。遠夢接衡霍。

登甘露寺多景樓

紺殿壓山脊。細路蟠雲根。重摩衛公塔。歲月何崩奔。名蹟久飛灰。硯石無留痕。英雄氣已盡。回向寂滅言。江天風色涼。晏坐開北軒。羈情尙隋苑。歸思過吳門。四月南紀綠。布穀啼千村。遙知舟中望。楚客多傷魂。

招隱寺

戴公遺青山。松門限畦畛。清風入仙梵。雲壑流不泯。空香層構出。密葉長廊引。西窺鹿跑泉。林影寫鏡錦。故人李約輩。藉草共瓢飲。微聆得至音。寒漱有餘凜。荒臺傳蕭梁。亂石如插笱。讀書今已無。耳學予自哂。古事滿禪關。追尋恐難盡。山上有昭明太子讀書臺

重游鶴林寺

晝長愛清陰。竹輿穿野田。寺門對峻嶺。標致餘千年。塵網米老像。香冷馬祖禪。空院何所聞。啄木聲琅然。頽垣斂古色。剝蘚出殘鏤。高吟亦云苦。後代誰爲傳。老僧修故事。補植紅杜鵑。可惜無客賞。流豔照山烟。竭來跡宛宛。久坐風翩翩。共證不壞性。且就虛堂眠。

題禹尙基畫白桃花

樂府爭傳渡口歌。淡妝奈此折枝何。冶春合就雲爲夢。笑月應憐玉作渦。盧女後時鉛粉薄。劉郎重到鬢絲多。亭亭付與徐黃手。輕著宮衣襯碧羅。

曲阿道中偶成寄秋玉佩兮

吟罷江山助發揮。沙鷗相與共忘機。天隨杜野小辛去。帆傍涼風深樹飛。浪跡只今堪寄傲。遠行苦愛不如歸。故人知我宜銷夏。遣製湖邊白葛衣。太平御覽引吳志岑昏鑿丹徒至雲陽杜野小辛聞皆駢絕陵襲施力艱辛杜野屬丹徒小辛屬曲阿

幼魯第五女生命名曰卻盜爲賦詩

爲盜不過五女門。鄙諺得之陳仲舉。女能貧家自古然。云何生女哺用脯。近來名女取於斯。錢唐有客符窮由阿父。幾年烏帽走京華。數升紅粟分天庾。聊將孩稚作解嘲。置酒倒箱情太苦。江斬人生女多者畢嫁作倒箱會見莊綽窮由阿父。幾年烏帽走京華。數升紅粟分天庾。聊將孩稚作解嘲。置酒倒箱情太苦。我聞女不貴勝人。與門之男衰門女。慰情目前雖可喜。綽

雞助

它年牽犬亦足辨。蒲覓

會見歸寧拜翁姥。我聞女不貴勝人。與門之男衰門女。慰情目前雖可喜。綽

帶心期終不沮。爲君試誦蘭偉房。若比徐卿神所予。

答沈申培見訪之作

雨入南湖動小波。造緇有客肯經過。階荒只是蛙難禁。門靜兼無雀可羅。沈約舊吟雌霓好。陳陶漫著癡書多。人閒回首皆塵土。始覺相期在礪阿。

雨後南湖晚眺

新漲夜來平釣磯。田家橋外涼溼激。湖雲倒破山一角。水葉亂搖風四圍。六月披緜氣候變。扁舟弄笛行人歸。吳興城南我舊識。小水晶宮知者稀。南湖。杭人名白洋池。葉紹翁四朝聞見錄云。白洋池在田家橋側。號小水晶宮。

夏秋之交臥疾南湖草堂辱竹溪沈六幼牧以佳句三首見寄如數奉答

經旬外戶不輕窺。當暑懷冰病亦奇。雨久蟻衣生壁早。夜涼螢火入簾遲。毀茶恐被高人笑。時以肺寒。稱藥甯煩妙友爲。灑灑心清無睡處。幾回落月有餘思。

溪堂十畝竹中居。數朶當門峯儼如。十字水分菱葉外。三家墅繞豆花初。珠聯羣從皆能詠。玉立諸郎盡解書。記得綠陰移櫂去。開尊聽雨卽吾廬。

夾山碧浪共縈回。佳處勞君憶不才。安得元真蓑笠載。先須摩詰畫圖開。鷗邊信誓明如日。菊候風流欠此杯。直待歲寒深雪裏。短篷安穩覓詩來。

寄調大宗納姬京邸

才子西清近接聯。鈿車初駕正華年。由來燕玉多能煖。何況張星本在天。學拜牀婆先鎖院。預修眉史有如椽。故人遠在江湖外。未得親逢卻扇筵。

八月二十五日病起吳敦復邀同宣城沈丈樗崖符幼魯施竹田王麀徵趙誠夫汎湖

八月杭州好天氣。病餘來上汎湖船。西風爲我健詩骨。鷗鳥狎人如水仙。白髮交游幾輩在。秋陰酬倡十年前。辛丑秋日與楞山幼魯竹田諸君賦湖上秋陰詩忽忽十七年矣。四山涼翠滴杯底。看斂斜陽雉堞邊。

題貞松慈竹圖爲歸安陳節母作凡五章申培之母

竹兮無心。榮悴忘只。松兮有心。飽雪霜只。

南榮竹雨。北牖松颺。有嫠者母。聽而淒其。

維竹之慈。子母鉤帶。母也似之。訓育罔怠。

維松之貞。柯葉不改。母也似之。銜辛卅載。

子賢而文。母壽而康。何以娛之。松竹在堂。又何侑之。歌吟鏘鏘。

侍讀徐壇長先生八十致仕書來索詩賦寄四首

風華江左流傳別。道脈閩南似續餘。大好玉堂揮翰手。廬陵文字魯公書。

特起孤臣出薜蘿。抽簪旋許主恩多。鄉人尙惜懸車早。已是懸車十載過。
曲臺集禮聚諸生。遠壓高齋學士名。頭白成書猶有待。儒林依舊屬遵明。
杖履蕭閑楚水旁。巋然海內魯靈光。自從醞得詩書味。別具天人一種糧。

秋日同高西唐游鐵佛寺

寺在揚州北郭爲五代楊行密故宅

樹壓平岡碧殿孤。我來何處弔楊吳。佛從劫火銷時見。秋到遙天盡際無。
草亂難尋生瑾墓。鴉歸猶學黑雲都。淮流不洗當年恨。誰與英雄酌一壺。

閏九日客廣陵同金壽門陳授衣閱廉風江賓谷集吳氏城東水檻

百年難遇此佳辰。料理殘秋發興新。小戶仍修送酒事。薄游先約試香人。
鉤簾鶴柴涼移影。俯檻魚牀淨洗塵。爲謝紅橋兒女道。不將歌舫污青蘋。
張約齋賞心樂事十月詩禪堂試香

秋玉游洞庭回以橘茶見餉

若士愛遠游。逸翮不可攀。朝乘一掌風。夕至洞庭山。曾吞三萬六千頃。
大圓鏡裏八九羅烟鬢。奇文祕句滿藤笈。山中清味攜俱還。
餉我洞庭橘。赤如莫釐峯頭日。白傅揀貢餘。右軍封題畢。
剪從平蕪閒折技。逆鼻香霏甘齒溢。緘藏歸待獻老親。不數湘湖楊梅頂山栗。
餉我洞庭茶。鷹爪顆顆先春芽。虎丘近無種。剔目名可嘉。
功能徹視比龍樹。金鏹不怕輕翳遮。淪以龔春壺子色。最白啜以吳十九瓊浮雲花。
翩翩風腋

乘輿到左神幽墟。列仙之所家。告訴我生困識字。素書探得何足誇。許我紫泉白芝鍊。毛骨大勝塵土螿。躑於天涯。

題秋玉洞庭詩卷後

自古浮天兩洞庭。千年詞客幾揚舲。愛君淡著有聲畫。收拾秋光補水經。

長至日雪次聖幾韻

荒徑人如掃葉稀。歸來畏影掩雙扉。故鄉自異他鄉節。三白今看一白飛。積處但添梅格古。烹時更助玉池肥。歲寒與子成來往。大好湖山付落暉。

答沈東甫病中見寄

寒臥湖村聽雁聲。來詩力疾見君情。天公應是憐清瘦。饒喫年年一箸羹。

小雪初晴訪敬身。於城南同游梵天講寺。延攬江山之勝。裴徊久之。敬身得五字古體一章。予次其韻。媿不稱也。

平生重心朋。造訪起寒早。坐對屋外山。無醜祇見好。遂果古寺游。雪後風力小。點素在巖崑。插翠出樹杪。露槃雙躑躅。檀越誰戴纛。用梁沙門法雲答周捨語願服埽塔衣。頂禮向雲表。故人詩格健。饑鷹獨奇矯。指示乾德年。備史藉藉考。井泥墮軍持。野火飛佛爪。歎息殿翼空。閑房叩幽窅。影壁蟲煥儼。經函闕微眇。重過歷十霜。

彌覺竹石老。試問護伽藍。江月幾回曉。卓哉眉山翁。心地久汛埽。白氈借餘溫。一聽妙聲鳥。

原作

丁敬

朝來幽事動。良友過我早。清游敦宿昔。一雪晴正好。邇迪城之南。幾度略約小。蹋凍乾蘚坡。徒倚疎林杪。礪風劃松雪。殘玉落翠纛。錢王此締構。突兀雙塔表。劫火雖皴皴。勾勒猶天矯。金容歸浩空。追蠹醫勿考。依稀景泰字。剔辨勞指爪。靈鰻應就墊。寒整懾深窅。袞回日亭午。古意益繇眇。高僧句通禪。心折玉局老。月履疑往來。烟鐘寂昏曉。久立肌骨森。煩慮脫如埽。江光瑩不搖。極目點雲鳥。

至後暖雨復雪旬浹不止得詩三首

水泉冬不枯。簷雨何浪浪。夜半礪磳明。誰發天地房。化匠有迴斡。風霰凌朝光。煦燠不可恃。君子履其常。王邇旣落毛。謝屐亦敗齒。雪片劇銀箭。急響撲窗紙。堆堆山字坐。寒燼挑未已。欲喚李書生。攜卷向星子。快雪如故人。歲寒輒復來。皎然照籬落。一白無嫌猜。朔吹爲宿留。十日相裴回。眼中昨暮兒。擾擾眞浮埃。雪中聖幾招。飲秋聲館用前韻。

高閑今似偉明稀。遲我衝寒款竹扉。笑伴近來雲易散。吟情豪甚雪爭飛。力將陶謝追風雅。恥共張何較瘦肥。三輔決錄何氏肥張氏瘦二族以此知貴賤玉茗花前一尊酒。病顏先爲發春暉。

南湖殘雪追和句曲外史山居雪霽韻

隱居佳處南湖上。雪後年年遠目凝。轉巷山光猶澹粉。入樓柳意半銷冰。平分幽事晴沙鷺。老我心情故紙蠅。絕勝蕭疎范寬筆。內家休背鴟紋綾。

次韻

錢唐符之恆 聖畿

先生闔戶坐十日。隔城山雪遠銷凝。南湖幾樹老臨水。東郭有人來踏冰。靜翫遽廬散野馬。微吟石鼎笑蒼蠅。病懷近愛梅花衲。不分香寒半臂綾。

立春後一日集吳敦復餅花齋次竹田韻

淨几單牀月上初。主人對客似僧廬。春來預作看花約。貧去宜求種樹書。隔巷舊游成結托。十年豪氣早銷除。依然不墜風流處。五畝園開手翦蔬。

原作

錢唐施 安竹田

一宿東風雪盡初。青鞵三五過林廬。深宵且對故人酒。淨眼同看善本書。飯顆中年吟易瘦。梅花老屋歲將除。春來自笑生涯儉。擬伴園官斲凍蔬。

次韻

仁和王曾祥 屢徵

眼看時序又春初。枯坐經年此屋廬。客至殷勤留半榻。酒闌珍重說遺書。荒街共聽更三點。殘雪猶分月滿除。好事主人情轉劇。辛盤還約試嘉蔬。時予下榻齋中

徐丈紫山今年八十三矣。居清波門外湖濱。病足不出戶。日事吟詠。寄示近作賦。此仰酬
兩年不見紫山翁。聞道嬰顏尚舊紅。脚疾偶然徐道度。詩名合繼鮑清風。宋鮑當居清波門外有詩
編曰清風自號鮑清風支離
一榻惟觀化。珍重雙餅但餉空。有約嚴城苦相限。柳洲乍可繫低篷。

題敬身所藏崔子忠伏生授經圖

樹底危坐秦博士。頭童背僂須眉蒼。彼姝侍側兩鬢妥。啓脣似有聲微颺。一人炯視面若削。高冠褒衣意
則莊。刻深頗似見顏色。穎川掌故稱智囊。據石作几俛首聽。手操不律書幾行。登來化我本齊語。豈至難
辨如公羊。此時未有蔡侯紙。非是簡策應縑緗。羸灰既冷孔壁匿。聖權獨賴生扶將。二十五篇復繼出。微
言大義難低昂。後儒往往疑作僞。欲與百兩俱淪亡。典午清淡那辨蒲切。此地下齒冷梅豫章。操矛入室
真鹵莽。安得生也相撐塘。北平崔丹古節士。布袍草履神揚揚。貴人乞畫怒不與。槁死土室甘饑飧。龍泓
館主得小軸。晨夕坐對齋屋張。遺經獨抱湖姚姒。樸學正可傳諸郎。猶勝濟南一女子。宛轉膝下青桂裳。

擬冬堂贈辭并序

乾隆丁巳夏五。予抱嗽上氣之疾。歷秋乃瘳。家人以爲有妖沴焉。歲除前四日。命巫歌樂。牲醴送之。周禮
所云冬堂贈無方無算者。此其遺意歟。因擬爲其辭。兼用杜子春後鄭二說。以俟采詩者。
節嘉平。修望祀。屑瓊糜。香猗靡。蘭肴芬。椒醕旨。青蜺旌兮旖旎。陳絲簧兮衆技。送將歸兮水帝子。騰游光

兮從宜。樹攘殘陰兮除舊。皇穹甚仁兮。災不可又。女媧游兮。康寘之野。桃爲弧兮。茅爲馬。召靈氛兮。占太人。五窮遁藏兮。壹氣孔神。倚東風兮。祝蒼華。區陬兮。密清。梅枝兮。橫斜。

鄭筠谷宮贊姑執書來兼以歛墨八枚見賦此代札

故人校文在江介。十年閒闊訊平安。素書忽照春坊字。漆點全分墨務官。舊史發凡憑綴述。筠谷嘗預小修明史詩何意助波瀾。風流轉憶今來少。欲往青山道路難。

除夕意林送糟藏松江鱸魚戲報以二絕句

今夕椒盤興不孤。一坭添得四腮鱸。釣公近有松江信。滿眼烟波陸瑁湖。皮襲美詩釣公來信自松江

衡門一任歲華流。老矣何知事五樓。忽覺頭銜兼兩地。鱸鄉亭長醉鄉侯。

正月九日夜同人集飲繡谷亭限燈字以下戊午

招尋芳夜興堪乘。四面垣衣一架藤。亭角夷猶新月上。春心牽率曲闌憑。漸生白髮惟耽酒。爲祝東風莫惱燈。從此樂方須次第。好將倡和擬松陵。

同吳西林汎舟西溪看梅

緩權縱遙目。心與春流平。邀侶以事解。得朋因寡營。峯色烟上霽。竹風沙外清。一夜叢梅發。幾處山窗明。香中林鳥語。引我沿溪行。積翠點殘雪。陰淡寒自生。西崦未云夕。東畬方可耕。稚子肯迎客。花閒啓柴荆。

尋泉源入西木塢

西峯偶通人。蘿蔦極幽蔚。崢嶸歷礪泉。徙迤殊未旣。積陽明亂流。春田相經緯。遠處落空林。數家住雲氣。竹根漱潭隩。汲飲有真味。將尋阿對居。樂飢豈無謂。

曉過福清竹院

探幽勇晨興。靜院鐘未歇。晴烟暎竹澄。殘月轉花沒。地僻養靈姿。氛潤蒙玉骨。有如列仙儒。初日晞薜髮。深山留古春。凡豔想易竭。老僧空色相。折取供白佛。護此無盡燈。常依妙香窟。坐聽籬落閒。絲羽嘒清越。

放舟河渚至蒹葭里

梅花界北渚。流水與花俱。隨花入水源。單汎同輕舃。白雲何方來。亭童過艤臚。芳洲始瀰漫。倒暎如敲湖。與子濠梁意。久脫塵事拘。持頤得靜觀。短楫畫菰蒲。際岸見山影。尙隱殘黃蘆。灣洄轉多態。中沚浮覆盂。梵放知有人。漁歌憶吾徒。翻然掠波去。淡淡春烟無。

始游木橋是梅花最盛處

地近高氏竹窗

略約舊通舟。幽徑緣溪迴。青山似遲客。一一花上來。迷濛始難辨。的皪驚已開。髣髴合江路。五分春信催。此地感興廢。豪貴荒池臺。不改蠶漁戶。並花分水隈。晴昊少風雨。古樹多莓苔。願就餘杭姥。吟翫傾深杯。擬游橫山不果回舟有作

市盡松聲孤。野曠山勢遠。橫山不可到。深秀紛挂眼。永懷江居士。高眠絕異患。靜笑泉出谿。冷愛雲在巘。
 穿翠若飛梭。嘉名錫策蹇。伊余有同心。未愜結廬願。誰云惜早芳。惆悵回橈晚。明江元祚邦玉築橫山草堂攜家隱焉有驢名曰梭
翠除夕山居詩云靜隱空山無箇事祇憐溪水一年忙高致可想也

哭沈東甫

曲曲溪雲抱隱居。晚年問業結相於。緇塵別後山河隔。白社生前笑語疎。高允誰為徵士頌。嵇康久作絕交書。篋中糾謬存唐史。尚有兒孫檢蠹魚。吳興諸沈問業不問房出范攄雲溪友議君所著有新舊唐書合鈔若干卷

晚過奔牛堰聞杜宇有懷汪西顥在析津

古堰經由處。蜀禽啼暮雲。風多聲易失。林靜語初分。歸客尚為感。居人如不聞。萍漂南北路。因爾惜離羣。

小舫次姚茶山韻

波平風定去猶遲。低拂藤枝與柳枝。長短橋通新雨後。兩三客坐夕陽時。紅窗旋學蘇州樣。白版閑題杜牧詩。略載些些脆絃管。看君不似釣魚師。

南湖中元夜

秋逼空街響暗葢。烟波館外覓行蹤。入懷驟覺風聲薄。出海偏驚月氣濃。野寺酸文招薜荔。水樓隱語託芙蓉。悵悵悄悄年年事。涼著疏簾第一重。

施北亭攜酒湖上

滿意扁舟拂曉催。涼雲遠岫自縈回。詩從青箬笠前得。秋在白荷花上來。老色漫隨時序改。好懷多爲故人開。雞頭菱角香無限。除卻江南無此杯。

秋日過吳西林郊居有作次韻二首

相對吳居士。清風自滿襟。迢迢黃卷事。寂寂白雲心。瑤瑟一以汎。素塵無復侵。誰傳寡女怨。彌使古情深。
時西林鼓自製
瑟作黃鸝歌。

原作

仁和吳穎芳西林

幽意紛無數。起行平野閒。秋陰在深樹。風氣似空山。寺古尋僧去。村遙冒雨還。君家饒鳥雀。能賞此時閒。
深。客意適林野。柴扉聚素襟。飯遲花飽眼。談淺瑟傳心。荒遠秋先得。紛埃事不侵。飄蕭門外葉。餘興綠蘿

閑。迎暮咽寒蟬。穿松入竹閒。訪秋吟過寺。拚雨坐看山。深樹學車接。長汀撩網還。不離城市遠。隨意水雲

同張妙峯探梅西溪留宿永興寺以下未

張侯崇清真。名理似禪伯。可與溪中游。獻歲事幽適。扁舟掠雲林。側帽望青壁。寒逗花信遲。叢篠綴疎白。

微香閉空崖。陰暄久未釋。淒淒烟雪零。黯黯羣峯夕。言造獨園古。唯有定水碧。西風轉澄廓。霽色上鳥翻。紛吾懷故人。存歿感在昔。昔年同游諸人。唯聖幾已歿。惆悵依佛燈。孤光照泉石。

新晴汎舟河渚過曲水菴

春宇得風霽。景氣亭午佳。微霽動川影。夾岸吹寒花。舟行不覺遠。來訪釋子家。聞磬尙隔浦。登閣如浮查。當境寂爲樂。徧知生有涯。願於繩坐參。幽蹤寄菱葭。長者號流水。童子能聚沙。他時記此會。竹外青峯斜。

法華山下詣太虛上人雲棲別室

閑門向深山。山翠莽回互。上人龍眠秀。蕭然挂巾屨。自言少年時。幾爲世網誤。辭家二紀餘。空有捐萬慮。見客久杜口。契我若雅素。不隨雲出溪。惟學藤倚樹。如聞竹林僧。復論巖壑趣。後期指庭梅。裴回不能去。

回舟經深潭口至秦亭山下作

平生塵累少。隔年微意申。及茲共沿越。謝彼風波民。窮幽閒藤竹。值曠迷涯津。春潭易爲綠。兼之山氣新。青山時近遠。乘流凡幾轉。不見花閒人。惟聞桑下犬。飄飄時氣舒。平臯天容淺。篙舟入翠微。枉渚何知返。

同西林櫻桃花下作

飄零梅雪一塔平。又見櫻桃照眼明。春色相催無俚甚。酒人散盡可憐生。施朱施粉妝難就。非霧非花畫不成。只有南朝宮體在。與君相約賦閑情。

同吳西林城東看花遇大風戲爲長歌

城南看花誰作羣。好事競造丁隱君。城東看花寂寥耳。相待獨有吳居士。新花破萼初滿叢。沙河浩浩揚天風。已看野渚動平碧。更覺連林搖亂紅。提攜町疇羨驥子。時西林令子象乾同行出沒葭亂多漁翁。過橋人似六鷁退。沽酒樽傳三雅空。風光如此肯虛擲。閉戶先生真可惜。澆花擬向卞公墳。彈絲亦就周家柏。淵明子哲兩達人。天地寧非百年客。有足愛踏三家村。有裾不撇七貴門。模糊落日望未已。遙山渲出臙脂痕。今朝風起花韞扇。莫使遲來花似霰。好將健句當青旛。日日花前一相見。

玉泉寺題壁

春來古寺聚輜輶。魚樂魚驚鏡裏懸。去盡游人寒食雨。和花流出鮑家田。

寒食前一日同竹田曦亮諸君汎湖

春陰一望黯迢迢。山淥湖光自動搖。過眼年時百五日。關心節物第三橋。香飛花片來杯面。寒送東風入櫂腰。油壁車輕歸路遠。雨聲留與可憐宵。

哭長城王立夫

酒杯曾記共秋堂。廿載流年抹電忙。敬禮小文誰可託。著明凶問轉難詳。圓扉夢噩猶回首。泉穴愁多也斷腸。何日水花風葉路。藝香山下弔王郎。君以事累速繫得釋歸六年而卒。

三月十八日同麀徵瑤圃右階蘇門游南屏山

南山三月暮。幽暎此林阿。僧寂房猶在。潭空客再過。洗松看塔小。坐石見湖多。卦剔屏顏字。吾今悟刹那。
昔訪亦諸上人於此。已二十四年。上人化去久矣。

同作

仁和孫庭蘭瑤圃

杖履陪清暇。憑高上翠微。崖碑隨徑轉。樵語出林稀。衆綠接湖水。殘陰帶夕暉。休嗟春事晚。流翫竟忘歸。

湖心寺見柳花作

亭亭酒舫著三潭。楊柳飛花水染藍。卻訝春衣風力緊。一天晴雪過湖南。

同作

仁和孫廷槐右階

楊柳千條拂釣磯。苦將飄蕩勸春歸。水心寺裏長廊外。不見花開只見飛。

題汪近人移居圖

買屋古城下。聞君喜客尋。圖書初檢校。鄰曲共幽深。墀壁除蛛網。開窗納樹陰。自憐流轉意。對此一沈吟。
五月二十八日渡太湖至吳江作二首

千古繁華地。茫茫浸遠空。猶傳澹臺墓。不見吳王宮。一鳥墮寒鏡。衆山移釣篷。如聞習流戰。零落藕花紅。

孤城繞江色。深覺此生浮。雲木秀田舍。水風清客舟。凭闌還放鴨。吹笛更驅牛。許我將家具。林塘卜最幽。

大雨泊塘栖稍霽行二十里復雨二更餘達杭州仍宿關外

嬌雷挾雨來。頓失溪光明。縛船並溪閣。看盡瓊瑰傾。遠山秀羸見。近山頽髻呈。澹碧那可畫。洸沐紛逢迎。山雲斂復吐。權入青蘆雨。林鴉未起時。翻疑宿淮楚。

夏夜同茨簷北亭飲章緒弘南軒以布囊春醉酒錢羸爲韻予得第二字

快風何由決土囊。開軒此夕迎微涼。南花破暝開且落。北斗挂林低復昂。愁裏著書準虞氏。酒邊暴謔如鄱陽。坐無拘忌可作達。籬外燈青歸路長。

北亭分得羸字詩未就戲爲促之

綠陰園館昨經過。洪飲分明似卷波。賸韻已聞拈競病。清吟定見和羊何。遲留十手傳鈔興。停待雙鬢書壁歌。詩將自來多整暇。其如劇壘致師多。

重過秋聲館追悼聖幾

斜日生衣更一來。竹邊門戶訝風開。展書誤字曾親勘。撫樹新陰尙近栽。已是披帷無處所。何因化鶴再飛回。牙絃一絕千行淚。山水清音爲寫哀。

秋曉過敬身幽居

蕭晨出南郭。雲氣拂衣流。蘭發空林雨。客來江館秋。鄰雞明復晦。梁燕去仍留。好在青楊巷。題詩語最遒。

次韻西林和徐申來無酒

我生少食酒。所賦有定命。眼雖識杯鐘。濡脣蓋天性。往愛同醉醒。近頗鬪豪橫。五斗昔稱賢。千鍾古云聖。

沈當戒豐侯。嗜或敗齊慶。此中得失林。覩縷豈易更。達人飲無何。不諱一日病。徐公高士孫。申來爲徐世臣先生孫先

生注名復社後爲僧名淨徒酒德頗雅正。空抱瘦木瓢。乃似僧盃淨。種黍思東臯。挹漿指西柄。長吟君試和。滑稽漫嘲

評。絕倒禁釀語。倚閣招手令。乞疑申西虛。呼肯庚癸並。君著北山經。樂勝奉朝請。奚煩未啐勤。但舉先酌敬。初筵若參我。微酣破幽負。一壺送潛汜。入咽如去鯁。

七月二十五日作

頌酒無能合閉關。小庭幽事詎全刪。樹留晚雨兼簷滴。闌臥秋花亞石斑。涼暑未平憐屬疾。夢醒同趣憶看山。何時竟得消摩力。六尺烏篷自往還。

予賃居南湖上八年矣。其主將鬻它氏。復謀棲止瑞石山下。有屋數楹。東扶導子。相度頗愛。其有

林壑之趣。以價貴未遂也。因用癸卯贈東扶移居韻寄之。并邀城南吟社諸君共和焉。

性僻愛高棲。依山靜聞見。懷此已有年。五藏待灑練。夙契西谿西。花深地頗善。近便城北隅。風濤展湖面。

廡下終借人。彈指信流轉。素交張長公。謀爲置破硯。林扉並南麓。江影白成片。峯敲翠盆入。巖裂泉自薦。

消搖隔市聲。聊可寄幽眷。老大役生理。來去如社燕。誰營草堂費。坐使襄陽先。洛中見山錢。囊空復何道。胡顏謝嵐霞。緘口向親串。瑞室頌有時。祗恐年鬢晏。

樊榭山房集卷第九

詞甲

國香慢

素蘭

路遠三湘。記幽崖冷谷。采徧瑤房。仙人鍊顏如洗。尙帶鉛霜。窈嫋東風搖翠。返魂處。佳珥成行飄零。遇張碩。已墮紅塵。還舞霓裳。月中何限。怨念王孫草綠。孤負空香。冰絲初弄。清夜應訴悲涼。玉斲相思一點。算除是。連理唐昌。閑塔澹成夢。白鳳梳翎。寫影雲窗。

齊天樂

吳山望隔江霽雪

瘦筇如喚登臨去。江平雪晴風小。溼粉樓臺。釀寒城闕。不見春紅吹到。微茫越嶠。但半亙雲根。半銷沙草。爲問鷗邊。而今可有晉時權。清愁幾番自遣。故人稀笑語。相憶多少。寂寂寥寥。朝朝暮暮。吟得梅花俱惱。將花插帽。向第一峯頭。倚空長嘯。忽展斜陽。玉龍天際繞。

百字令

樊榭山房集

卷九

丁酉清明

春光老去恨年年。心事春能拘管。永日空園雙燕語。折盡柳條長短。白眼看天。青袍似草。最覺當歌懶。悵悵門巷。落花早又吹滿。凝想烟月當時。飭簫舊市。慣逐嬉春伴。一自笑。桃人去後。幾葉碧雲深淺。亂擲榆錢。細垂桐乳。尙惹游絲轉。望中何處。那堪天遠山遠。

西江月

靜極翻如有待。眠多未是無憀。柳花毬轉碧窗綃。不信東風纔到。閉月三三小徑。藏鶯六六彎橋。香囊蟬錦嬾重挑。乞取春愁閑了。

疎影

湖上見柳影因賦此闕

輕陰冉冉。正嫩苔弄碧。庭宇深掩。千縷柔魂。搖蕩如烟。無端忽度闌檻。章臺路。暗人歸處。看足了。斜陽濃淡。又幾痕。水際低窺。近日楚腰全減。依約勻梳月底。亂雲鋪滿徑。籠住文簾。欲結同心。空試萸苗。作上聲就三分銷黯。寒添白袷。清明後。帶不盡。隨風微斂。最鏡中。再寫秋疎。記得踏枝鴉點。

桃源憶故人

螢

夜涼那更秋情獨。冷燄雨餘輕撲。墜處溼黏簾竹。瞥見因風逐。穿烟照水猶難足。小簾窺人新浴。殘月剛移桐屋。一箇牆陰綠。

惜餘春慢

戊戌三月二十二日汎湖用清真韻

綠徧山腰。青迴沙尾。花信幾風吹斷。屏閒烏度。鏡裏舟移。乍試苧衫綃扇。常把禪機破除。難負春妍。流光如箭。正蘅皋稅駕。鞦韆塵不動。黛明波遠。看漸是。弱絮縈烟。新荷鑄水。麗景一番熏染。初啼鳩後。將噪蟬前。池閣嫩晴千變。誰道凭闌有人。暗憶年華。自憐幽情。且停橈淺酌。霏雨霑衣數點。

摸魚兒

得汪舍亭婺州晚春見懷詩用蛻巖韻答之

又騰騰。一番春晚。無情潮落江浦。故人猶憶春前別。不肯載愁流去。窗暝處。展淡墨。吳牋忽見殷勤語。客懷定苦。在穀水雙流。沈樓一角。日日獨看雨。淒涼意。不數淋鈴督護。風流那減張緒。平生我亦多情者。更搢酒邊遺譜。還問取。問青子。綠陰可記城南路。休歌爾汝。待再覓郵筒。餘花晚筍。刻意爲君賦。

臺城路

賀

青萍葉大桐花落。村村又鳴鳩婦。細雨如塵。餘寒若水。蟻動吳園時候。狸奴聘否。怪生客偏憎。閉門長晝。守定蘆簾。三眠三起似人柳。深窗幾回罷繡。挽籠鉤陌上。親費搵手。夜屋燈邊。曉牆烟外。最怕銀篋飢後。心情漸逗。記瓦卦曾占。蒺藜山將就。待寫雙蛾。更呼鄰女耦。

夢芙蓉

戊戌五月十八日汎舟碧浪湖作

曉天魚板響。趁青蘋風起。碧鷗波漲。一枝塔影斜曩。打雙槳。道場山在望。仲姬猶贖眉樣。劃碎玻璃。占蘆灣柳汶。新雨欲沈網。何處紋簾捲上。白紵歌輕。去也終怙悵。雙鬢可買。應作五湖長。水雲連浩蕩。杜郎元是疎放。有日重來。願身爲鵲鏡。妝臉鎮相傍。

永遇樂

戊戌閏中秋

恨海填平。情天補就。月共秋駐。秋半偏雙。月圓卻再。減了閑風雨。井梧知信。又開一葉。羅薦較涼前度。想沈沈。青冥萬里。此情此夜尤苦。殷勤露下。把杯重問。也算平生希遇。蚪箭聲添。鸞簫約爽。不少傷心處。干卿何事。清輝依舊。更按桂花新譜。便鴉啼。紋窗影轉。忍教睡去。

浣溪紗

數到湘琴未滿絃。春殘過了。摘櫻天。芳時卯飲最思眠。八字眉痕剛半畫。二分月影恰重圓。第三橋外見飛仙。

蝶戀花

一片東風吹豔雪。錦瑟如人。忍使華年歇。夢去青溪溪畔月。洛神休寫王家帖。非霧非花疑剗轆。楚客多愁。鳳紙新來絕。落葉依枝飛又怯。秋匳空羨泥金蝶。

霓裳中序第一

宋德壽宮芙蓉石在南樞署

牆陰擁翠浪。搔首繁華成俯仰。藤絡苔皴草長。是親見光堯。蓬萊無恙。香銷玉葬。怕夜深。山鬼來往。淒涼處。奉華舊閣。記否捲簾賞。惆悵。疎菴藏響。雨洗淨。嶙峋十丈。芙蓉孤倚。月幌。問點額宮梅。已歸天上。冷衙蜂乍放。不照到。銅溝膩漲。青蕪裏。宣和金字。也是此情況。宋梅已枯

菩薩蠻

題呵手梅妝圖

斜紅不暖凝酥面。春來未許春鶯見。小凭侍兒肩。花寒人可憐。無言空擁袖。蘭氣熏花透。髻壓一枝斜。前身萼綠華。

摸魚兒

己亥初春過太湖次李秋堂韻

尙愍愍垂虹春早。殘蘆風裏如語。愁陰不散烟汀闊。一葉輕波翔舞。扶柁去。望練繞吳城。幾點青旗字。鱸鄉社樹。想霧鬢風鬟也。憐寒峭。淺翠照眠鷺。千年事。零落荒臺別墅。乾坤元是孤旅。漫臨匳鑑。驚清影。客子何堪塵土。須小住。看重疊雲衣。裹就湖天暮。低眠舊浦。續漁具。因緣。茶人滋味。休寫斷腸句。

滿庭芳

寄暢園在惠山下。梁溪勝地也。引第二泉穿垣而入。匯爲大池。有聲幽潺。池中多磐石。上芘喬木。皆數百年物。軒楹倒影。與波澹蕩。己亥暮春十有三日。汪青渠邀予來游。坐蔭弄水。顧而樂之。同行虞山沈生。彈箏作秦聲以佐酒。因成此調。青渠近買吳姬。自杭來家梁溪。故戲及之。屋借峯圍。徑隨泉改。過橋別是深清。闌干十二。眞在鏡中行。不道黃衫去久。風前樹。猶帶茶聲。江南好。菟裘似此。何用買傾城。攜朋春已謝。梅丸緘怨。蕉紙書情。任陰陰隔葉。啼老吳鶯。明日片帆催發。幽崖畔。正有雲生。句留住。簾紋設否。容我聽調箏。

浣溪紗

奔牛道中初晴

莎雨前宵打布帆。柳花今日撲征衫。催春杜宇怨春酣。天有心情雲破碧。風無氣力水揉藍。銷魂時節在江南。

揚州慢

廣陵芍藥

疎雨催妍。穉寒凝態。天涯相見魂銷。問春歸幾日。未盡減春韶。算亭北、新妝老去。不多風露。暗展輕綃。送杯中、婪尾。香心欲話無聊。鴉黃初試。記當年、曾識烟苗。奈月幌低籠。雲塔斜倚。夢到迢迢。除卻謝郎俊句。無人與、淺暈深描。想難禁、攜贈離情都在紅橋。

賣花聲

徐翻翻書扇自稱金陵蕩子婦

花月秣陵秋。十四妝樓。青溪迴抱板橋頭。舊日徐娘無覓處。芳草生愁。金粉一時休。團扇誰留。帶人只有小銀鉤。句尾可憐書蕩婦。似訴漂流。

玲瓏四犯

惲正叔西湖汎月圖爲陳玉几賦

寒玉砌瀾。脩蛾橫綠。青天明月初湧。人閒今夕好。柳外涼陰重。沈沈兩堤跨竦。問何人、曲聲吹送。酒面邀

秋船頭照影吟思欲飛動。烟空遠眸堪縱。想菱颺亂起。荷氣深擁。清歡驚易曉。光景隨塵鞵。南田詞客。今仙去。賸沙鳥來成幽夢。誰與共。襄回寫。閑情數種。

水龍吟

用丁宏菴韻

客懷偏恨秋陰。故遮一半闌干影。葦欺人獨鵲欺。書滯何曾慣聽。疊疊吳雲。迢迢楚水。悠悠醒枕。漫尋思。那日。門前銀浦。不抵似。關山永。凝立風簾露井。可能拌。參差簧冷。飄零愁髮。蕭條長缺。無言自領。樓月斜初。篝烟清後。舊家標韻。又新涼陡起。添衣時候。去聲。西窗暝。

采桑子

晚秋同程松門汎舟紅橋登平山堂

重陽過也成虛負。賴有詩仙。肯作延緣。人與黃花共一船。沿堤轉盡垂楊路。水影橋邊。山影樽前。畫出傷秋雨後天。

高陽臺

題華秋岳橫琴小像

劍氣橫秋。詩腸滌雪。風塵湖海年年。三徑歸來。慵將身事。賤天。草堂不著櫻桃夢。寄疎狂。菊圃梅邊。想清

游如此須眉。如此山川。枯桐在膝冰微冷。縱一絃雖設。亦似無絃。世外音希。更求何處成連。幾時與子蘇堤去。采蘋花。小艇衝烟。笑平生。忘了機心。合伴鷗眠。

尾犯

坐趙谷林西池泊花檻。看新種青蘆。悠然動江湖之興。

水空雲淨。見菰蒲叢外。數枝交暎。梢梢瑟瑟。無人處。被荷風吹醒。搖波十里。遠界破。青山影。作去秋聲。不到秋來。要君倚檻閑聽。最是淡烟低暝。逗漁燈。前浦冷。便移栽蕩戶。添箇根邊。鴨雛游泳。捲葉鳴笳。揉花裝被。尙遲清興。又何似。折取橫江。相思還踏三徑。

清平樂

風梭織雨。萍葉籬根聚。水滿蘭橈應斷渡。昨夜夢魂來去。春衫起樣休寬。偷描一一輕鸞。將息釀花天氣。憑他料理餘寒。

曲游春

郊外探春作

一水仙源曲。被柳條遮斷。千縷婀娜。有約湔帶。怪逢伊還向。重簾單舸。出意新梳裹。看颺鬢。葉黃微澆。縱近來。遠似天涯。誰倩玉顏初破。禁火。心情偏妥。伴錢藕偷分。鈿苻輕墮。容易斜陽。恐穿烟鳳子。尙尋珠

睡波面虹橋臥任怨咽。玉簫吹過。無奈澹月籠燈。翠屏恨鎖。

一枝春

城東許氏水軒。臨流梨花一株。妍淨可念。主人命酒邀賞。已半落矣。感而賦之。

縹蒂無多。過清明。幾度東闌愁凭。飄搖素羽。漲曉乍迷天鏡。垂楊倦眼。似相見。雪融酥凝。拌早趁。深淺沾春。護惜夢雲輕冷。聲聲鶉鴉催暝。憶初籠香雨。烟銷娟靚。清蟾墜小。瘦減玉兒妝影。憑誰看取。好留向。繡牀低暎。還帶葉。偷綴瓊絲。晚風未肯。

感皇恩

已是殺釘花。月籠深閣。何處行雲到巫峽。一灣流水。只有浮萍開闔。依稀親記。鬪池邊鴨。明日暖風。蘭紗裁夾。玉翦多情度。簾押。蜜犀燭。忿定帶露痕。偷掐。幾時頻見也。織紅甲。

丁香結

暮春初霽用清真韻

吹落嬌雲。展開平碧。枝上雨殘猶隕。恨流光偏迅。數景物。賸得鶯愁蜂潤。小紅曾紀否。朝醒殢。薄寒自忍。可憐游舫。散後定是。蕪菁開盡。相引。早餽釘陰晴。花信催過幾陣。曲巷幽坊。柳絲竹粉。翠樓生暈。謝家飄蕩紫額。翦麴塵盈寸。凭闌干。那曲冶葉何人摘損。

高陽臺

成窯九十九子瓷合。金壽門索賦。云是宮中妝具也。

祕翠分峯。凝花出土。依稀粉滴脂函。鈿合前塵。宮羅冷卻。菱尖浮梁。猶有當時月。向夜深。孤照秋奩。怨長門。夢斷蒼龍。字漬眠蠶。戲嬰圖子誰描得。恰臨妝試仿。黛筆重添。數比蠡斯。未曾盈百。休嫌從今舊價。卑哥汝。宛青蛾。紅淚偷淹。莫銷魂。漢苑瑤箱。久落江南。明時。瓷器進御者。皆出浮梁之景德鎮。

眼兒媚

一寸橫波惹春留。何止最宜秋。妝殘粉薄。矜嚴消盡。只有溫柔。當時底事忽忽去。悔不載扁舟。分明記得。吹花小徑。聽雨高樓。

西江月

春淺初勻細黛。寒輕不上仙肌。玉梅花下見來遲。夜月深屏無睡。心倚紅牋能說。情除青鏡難知。試香天氣惜香時。人靜街痕如水。

三姝媚

櫻桃花

嬌鶯含得未。正眠燈風收。繁心低綴。薄暈微頰。學玉窗勻面粉。淹脂淚。悄探芳期。先占了。沿溪桃李。無語

銷魂偷折斜枝。下堦游戲。休觸蜂須飛墜。到細數圓珠。好春流水。翠沼深深。照一庭隴月。暖香吹碎。記
挽單衫。相送嬾。難醒殘醉。隔著重簾花下。曹騰喚起。

淒涼犯

庚子十二月二十四日宿濟南敖陽店寒甚有懷故園節物悽然作此解。

疎林宿鳥。柴門裏。凝塵半榻誰埽。倦程繫馬。風刀裂酒。雪花欺帽。何時古道。看長倚。敖山翠小。又燈昏。寒
星照戶。不使客愁少。敲枕尋思處。畫句爐閑。印梅窗杳。歲殘氣味。歎詩人。在家貧好。底事飄蓬。竟輸與。
蛾兒夜鬧。恐明朝。漸看鬢影似暗老。

慶清朝慢

辛丑長安元夕同王雪子金繪卣集汪西亭水部寓齋賦。

掃雪燈樓。障風酒幕。千門春散京華。閑情似夢。小歡深醉銷佗。莫趁走橋人去。故園伴侶在天涯。當杯有。
一般好月。燭影初斜。簫鼓隔牆未厭。況水曹詩俊。淡墨棲鴉。疎香共憶。窗外應少梅花。從此滿城鬪草。
細娘催上卓金車。心期遠。鶯邊古寺。雁外晴沙。

玉漏遲

永康病中夜雨感懷

溥游成小倦。驚風夢雨。意長牋短。病與秋爭。葉葉碧梧聲顫。溼鼓山城暗數。更穿入。溪雲千片。燈暈翦。似曾認我。茂陵心眼。少年不負吟邊。幾熨帛光陰。試香池館。歡境消磨。盡付砌蟲微歎。客子關情。藥裏覓何地。烟林疎散。懷正遠。胥濤曉喧楓岸。

百字令

月夜過七里灘。光景奇絕。歌此調。幾令衆山皆響。

秋光今夜。向桐江。爲寫當年高躅。風露皆非人世有。自坐船頭吹竹。萬籟生山。一星在水。鶴夢疑重續。挈音遙去。西巖漁父初宿。心憶汐社沈埋。清狂不見。使我形容獨。寂寂冷螢三四點。穿破前灣茅屋。林淨藏烟。峯危限月。帆影搖空綠。隨流飄蕩。白雲還臥深谷。

憶舊游

辛丑九月旣望。風日清霽。喚艇自西堰橋。沿秦亭法華灣洄。以達於河渚。時秋蘆作花。遠近編目。回望諸峯蒼然。如出晴雪之上。菴以秋雪。名不虛也。乃假僧榻。偃仰終日。唯聞櫂聲。掠波往來。使人絕去世俗營競所在。向晚宿西溪田舍。以長短句紀之。

遡溪流雲去。樹約風來。山翦秋眉。一片尋秋意。是涼花載雪。人在蘆漪。楚天舊愁多少。飄作鬢邊絲。正浦溼蒼茫。閑隨野色。行到禪扉。忘機。悄無語。坐雁底焚香。葢外絃詩。又送蕭蕭響。盡平沙霜信。吹上僧衣。

憑高一聲彈指。天地入斜暉。已隔斷塵喧。門前弄月漁艇歸。

聲聲慢

題符幼魯風雪歸舟圖

征衫換色。客枕催寒。川塗自古酸辛。楚尾吳頭。風雪獨自歸人。低迷凍鷗片影。恐吟魂攪亂江雲。遠望外。有敗蘆斷竹。何處孤村。莫怪蒼山白首。看淒清到此。愁也如君。溼重帆遲。贏得畫裏閑身。灘空夢回犬吠。正鴻妻相候柴門。待歲晚。酌椒花。全未是貧。

長相思

綠萼梅

生九疑。住九疑。自小山光染玉姿。碧羅天上飛。春到時。雪到時。獨向花中咏綠衣。斷魂烟月知。

沁園春

心

一寸通犀。脈脈難窺。含無限情。記鍼纔棘刺。捧時尤媚。鎮餘銀液。捫罷偏驚。小恰容憐。芳能颺恨。莫近彈碁最不平。羅襟掩。歎幾曾灰盡。半爲琴聲。覆蓮狀未分明。愛慧性玲瓏在。目成乍歡。娛著處。忤如危柱。別離催就。亂若懸旌。門裏輕挑。秋來暗合。閑悶閑愁。特地生花。前見算除非換得。方表深盟。子華子。心狀如覆蓮黃庭。

聖詞爭知我門裏挑心吳文英詞何處合成愁離
人心上秋願覓詞換我心爲你心始知相憶深

齊天樂

秋聲館賦秋聲

簾淒燈暗眠還起。清商幾處催發。碎竹虛廊。枯蓮淺渚。不辨聲來何葉。桐飄又接。盡吹入潘郎。一簪愁髮。
已是難聽。中宵無用怨離別。陰蟲還更切切。玉窗挑錦倦。驚響簷鐵。漏斷高城。鐘疎野寺。遙送涼潮鳴咽。微吟漸怯。訝籬豆花閒。雨篩時節。獨自開門。滿庭都是月。

賣花聲

壬寅立春日作

春信一番新。春水生鱗。春花春鳥尙逡巡。翦就釵頭春勝也。添箇春人。準擬踏春塵。春色初勻。春風困著小腰身。製就春詞知幾首。帖寫宜春。

西湖月

明慈聖李太后賜畫九蓮觀音像在靈隱寺借秋閣

愬恩夢了華胥。早鷺嶺窗前。貯將圖畫。翠纓長帶。銖衣細疊。冷綃光研。巖居瞻瑞相。展一椹松風塵外挂。任水際。苦入秋心。依舊九蓮開也。署年髣髴神宗。說侍養深宮。白頭閑話。月輪圓裏。山河小影。似驚飄。

瓦興亡多少事。便指與枯禪。應淚灑。已零落。阿監當時。奉香黃帕。

綺羅香

壬寅春分約徐丈紫山同賦

水榭收燈。虹梁待燕。判斷韶華如許。九十芳辰。一半自今堪數。嬌意緒。欲暖翻寒。嬾心性。乍晴還雨。已飄殘。梅雪鱗鱗。井桃花信未遲暮。簫樓應惜冶思。誰在生香徑裏。和鶯低語。約略東風。好似破瓜眉嫵。剛宿露。蝶夢攙勻。更惹烟。柳絲偷取。悵年時。一掬春愁。試分知解否。

阜羅特髻

賦包頭

膠鬢攏罷。稱滑笏吳綃。褶成如水。淺緹素額。更斜遮蟬翅。重窺鏡。非關怕冷。上頭初。愛道隨時。世最宜淡。恣恣略施珠翠。還把一痕。緜擘襯微微。紅起春愁。困莫教半卸。到殘妝。秀暈分明。是碧烟。抹斷看兩蛾尤細。

夏初臨

初夏雨中同蔣丈靜山汎湖

蘸就魚天。搓成鷗雨。空濛撥櫂遲遲。無數蘋花。輕香點破。漣漪遠。風沿岸斜吹。溼青蓬。誰弄參差。湖心亭

柳千條。曠波纔是愁時。可憐春去。追送今朝。破除酒病。更鬪槍旗。簾釘窗眼。曲游俊侶。都非。那不淒迷。放殘陽。綠過橋西。記蘇堤。衣香後船。柔擲枝枝。

喜遷鶯

初夏

竹香新引。漸綠到岸東。茶蘼吹盡。描繡心慵。行棊聲歇。長日瑣窗清潤。閑臨小風揮扇。涼思先歸鬆鬢。爲誰瘦。鞦韆衫。尙束春前幽恨。芳信緘密意。蠅字玉釵。待摺榴巾問。鬪茗樓前。澡蘭屏底。猶記那回眉印。幾絲麝煤飛度。山枕天涯。翻近夢。催破聽迎梅雨。點敲簷初緊。

八歸

隱几山樓賦夕陽

初翻雁背。旋催鴉翼。高樹半挂微暈。銷凝最是登樓意。常對亂波紅蘸。遠山青襯。不管長亭歌欲斷。漸照去。鞭痕將隱。想故苑。燕麥離離。滿地弄金粉。何況春游乍歇。花愁多少。只惱黃昏偏近。冷和帆落。慘連笳起。更帶孤烟斜引。誤雕闌倚徧。霽色明朝也。應準無言處。望中容易。下卻西牆。相思人老盡。

大聖樂

東園餞春追和草窗韻

空苑游絲。舊池飛燕。薄陰千樹。正小闌人意厭厭。細數亂花翻怨。錦鳩呼雨。皺得綠波新如倦。似無奈。啼
綃臨別浦。春何在。在南陌。麴塵西窗烟縷。閑思古今事苦。有紫曲青樓千萬語。且寄愁彩筆。橫塘重見。
楊枝應許。尙戀淺寒羅衾曉。記門掩紅香深院宇。傷飄泊。是誰倚疎簾吹絮。

雪獅兒

華亭錢葆飭以此調詠貓。竹垞翁屬和得三闋。徵事無一同者。予與吳繡谷約戲效其體。凡二
家所有。勿重引焉。昔徐鉉與弟錯共策貓事。鉉得二十事。錯得七十事。作此狡獪。殆非詞家清
空婉約之旨。觀者幸毋以夢窗質實爲誚也。

雪姑迎後。房櫳護得黃晴明潤。撲罷蟬蛾更弄飛花成陣。穿籬遠近未肯傍。茸氈安穩。念寒夜。假衾煖處。
夢尋燈暈。繞膝聲聲低問。似無魚分訴。憐伊嬌困。展膊屏前。髣髴三生猶認。懷春最恨。漸取次歸來難
準。瓊籤盡。上案晴蟾鋪粉。白雪姑貓名。見清異錄。宋葉紹翁貓詩。醉薄荷撲蟬蛾。見隨隱漫錄。張良臣山
無魚。又祝貓詩。江上孤蓬雪壓時。每懷寒夜暖相依。從今休慣穿籬落。取次懷春壓不歸。吳仲孚貓詩。弄
花撲蝶。悔當年。喫到殘糜味。卻鮮不肯春風留業種。破甕尋夢佛燈前。名畫評。何尊師貓。有展膊者。金王
良臣貓詩。三生白老與烏圓。
徐集孫詩。亂葉打窗貓上案。

又

前題

花毛褐染炎天尚記。荷塘爭浴鼠卜閑時。畫損砌苔幽綠。闌干幾曲。任側輓。橫眠初熟。恰又斂。脩脩金尾。蝶衣偷蹴。忽起驚跳風竹。聽蠅鳴茶鼎。何曾輕觸。暮眼緣圓。香綺叢邊看足。簷聲斷續。休喫盡草芽盈。掬娛幽獨。勝了狡狴鏤玉。西陽雜俎。楚州射陽出貓。有褐花者。埤雅。貓亦如虎。畫地卜食。俗謂之鼠卜。元唐盧延遜詩。貓跳觸鼎翻。埤雅。貓。早暮則眼圓。宋張至龍詩。貓臥香綺叢。田家雜占。貓喫青草。主雨。

又

前題

妝樓鎮臥底須詰取。於菟癡小。解事吳娃。戲學鳳仙親擣。紅絲繚繞。便萬貫呼來還少。防失卻。囊蹄重鑄。閑坊尋到。蟋蟀吟中醒悄。正無聲四壁。立殘斜照。不捕依然。塔藥紛披藏好。攜兒乳飽。坐榻畔。微溫相惱。春回早。八九牆陰新埽。詰。貓詩。劉後村作。柳貫。貓詩。花陰閑臥。小於菟。癸辛雜識。回國婦女。以鳳仙花染貓。爲戲。秦氏女孫。失貓。下臨安府訪之。不得。賂以金。貓乃已。袁桷。醉貓詩。醒來獨立。闌干畔。四壁無聲。蟋蟀吟。李羈之。畫貓。在藥苗間。程鉅。失貓詩。金絲色。輓坐常。溫飽。食深宮錦。作墩。古諺云。八九七十二。貓。犬尋陰地。張搏家。貓名萬貫。貫見記事珠。

又

前題

稱伊虎舅斑斑璫璫。身邊頻覷。食有溪鮮。又上小庭高樹。如工拗怒。想喚汗多。應回顧。何事費。蛾眉畫手。穴中空怖。延頸盤旋爭赴。笑綠沙韓底。深憐羣聚。銷得侯封也。算北門長護。青錢百數。買雙耳。微痕添

鏹。窺鸚鵡。月季花前亭午。陸游詩自注。俗謂貓為虎舅。教虎百為。惟不教虎上樹殺鼠。如工用柳文白。斑鼠。南部新書。連山張大夫搏好貓。每視事退。入中門。數十頭曳尾延頸接。入以綠紗為幃。聚其中。以為戲。金李之純。貓飲酒詩。只向北門長臥護。也。應銷得醉。鄉侯說苑。驥駮駢使。之捕鼠。不如百錢之狸。爾雅。翼貓耳。經捕鼠之後。有缺。如鏹。工餘慶。畫有月季貓。

思佳客

吳中作和繡谷

窄窄紋窗小小舟。空波一片漾難收。滿天細雨曾成夢。壓水涼陰半倚樓。深玉瓊。暖香篝。夾紗衣薄不曾秋。吳中舊事君知否。晚泊荷花為洗頭。

原作

吳焯

江上涼雲江上舟。闌門晚市未曾收。銀絲燈曠東西水。梔子花香上下樓。分半臂。理雙篝。河風蕭瑟夜如秋。琴臺一點西施月。猶照吳王城上頭。

樊榭山房集卷第十

詞乙

東風第一枝

癸卯元夕雪晴

拂柳蛾消。妝梅鶴瘦。玉烟吹散無影。放教明月初圓。最憐倚篝漏永。街泥不斷。已減卻、燈邊遊興。料粟肌、籠袖香留。笑裏有人偷並。占響卜、紫姑誰證。思舊約、素娥暗省。一番花信添寒。十分草痕洗淨。凝情買夜。漫再認、飛鸞窺鏡。悔少年、爭逐輕塵。得似煮茶風景。

浣溪紗

馨折春波吹婢魚。粉塘烟竹迥蕭疎。此中堪注水經無。蘭語脛疑鶯谷近。柳情慵覺燕簾孤。晚風休減玉肌膚。

高陽臺

落梅

縞月啼香。青禽警瘦。遺環與恨俱飄。雪沒鞦韆痕。何人爲掃溪橋。東風欲避層臺遠。御風歸。第一春銷。惱相

思枝北枝南。冷夢迢迢。山空記得吟疎影。拾參差片腦。自裹冰綃。湖水無聲。流殘舊怨新嬌。餘酸已在濃陰裏。怕重屏。半萼難描。更堪他消息。經年雨暮烟朝。

木蘭花慢

城西開元宮。本宋周漢國公主府。元時句曲外史張伯雨入道於此。外史開元宮得月軒詞。有環堵隘。花狼藉。溝水漲。雲充斥。似石魚湖小。酒船寬窄之句。今闌入軍營中。僅矮屋數楹。奉高眞像。旁有隙地。積水縱橫。猶是當日陳跡也。雍正癸卯二月十九日過之。書此以貽訪古者。

自吹簫伴去。還再住。列仙儒。想瑤草呼龍。梅花待鶴。詩鬢慵梳。平生愛尋先隱。冷襟懷。要與俗人疎。可惜風騷零落。而今纔到清都。漫郎曾賦石魚湖。流水繞塔除。賸一片涓涓。斷雲新柳。照影荒渠。宮闔已銷餘豔。覓彩毫。何處寫黃圖。說與游人記得。羽觴汎也應無。

點絳脣

次韻答紫山見寄

節近清明。一池春綠蛙催雨。凭闌無緒。目送年芳去。擬翦湘天。不供牋愁句。相思苦。花無重數。紅認斜陽暮。

原作

錢唐徐逢吉紫山

似箭流光。梅花雪後櫻桃雨。忽忽離緒。春要平分去。記得年時。共賦銷魂句。今何苦。落花無數。人隔春城暮。

思佳客

柳

自琢新腔唱柳枝。段家橋外水仙祠。絲輕最在無眠處。腰弱尤看不舞時。鶯一轉。笛孤吹。碧波澹澹影依依。春風若爲長條惜。應遣情人少別離。

少年游

春日訪紫山同坐學士橋望湖

南屏新畫。西冷小隱。動卽到君家。船載湖光。橋分野色。一鳥落雲沙。十年無限傷春意。說與小桃花。結客金空。游仙枕在。風外祝蒼華。

絳都春

清明風雨

烏衣過客。約孤注賽春。春遠輕擲。潤被換香。低几留燈。愁通夕。餘寒猶是連寒食。強偷哂。清明天色。傍簷攜手。茸茸柳眼。淚痕頻滴。敲側。前年舊旅。寄單枕悶把。臥枝花摘。水外澹紅。簾底纖瓊。游蹤隔。文園多

病何人惜有鬢影參差知得便教晴蝶敲風岸陰翠織。

瑞鶴仙

賦聖幾齋中牡丹名藕絲霓裳種來自亳州。

海天霞未卷和曉岫空青付誰裁翦花師戲成幻約嬌春千里翠深紅淺回頭意嬾但微認崔徽背而暎衫痕一色惺惚誤道藕絲秋半曾見夢中彩筆歌畔檀唇醉餘羅扇雲窗月館湖山在舊情遠便聽風聽水霓裳譜得自對珍叢夜怨問尋芳人瘦如何細看帶眼。

念奴嬌

甲辰六月八日子將北游東扶聖幾餞予湖上泊舟柳影荷香中日落而歸殊覺黃塵席帽難爲懷抱矣因用白石道人韻歌以志別。

孤舟入畫怪人閒誰寫漁朋鷗侶起坐不離雲鳥外倒影山無重數柳寺移陰葑田挖碧花氣涼於雨詩成猶未遠蟬吟破秋句忽記身是行人勞君把酒暫揖湖光去共惜風亭今夜笛月逗離聲前浦千里幽襟一堤野思終擬將家住甚時攜手水荻搖曳烟路。

好事近

吳江月夜

夾岸響青蘆。瑟瑟吳波搖碧。天借一帆風勢。看垂虹秋色。滿船明月照無眠。今夕是何夕。應被素娥笑我。太疎狂蹤跡。

點絳脣

題授衣讀書稻田隅圖

片雨斜陽。柳陰濯足看行水。世間良計。識字耕夫耳。風約雲萍。又向蕪城會。推書起。酒闌無味。爲我言田意。

菩薩蠻

馬佩兮梅花卷子。寓騎省之戚。徵予賦此。

微波冷託湘筠色。高枝早信尋難得。玉骨不爲泥。輕於雲一絲。鏡花留半影。最薄東風命。楚角莫飛聲。人閒無此情。

蝶戀花

長安秋雨夜賦

曲巷低窗雲色暮。節近黃花。又下淒涼雨。長記江南楊柳渡。孤篷翦燭曾聽處。悔別翻將書信誤。雁落吳天。已是愁難訴。今夜長安千萬戶。相思不爲砧聲苦。

定風波

甲辰冬杪南歸。過邗城。祓江見留。酒閒款語忘暮。月黑江寒。行五六里。送至舟中而別。到家旬餘。祓江書來。作此寄之。

記來時。傍柳維舟。歸人一寸心折。歲晚高鴻。天寒脩竹。欲下山陰。雪硯香凝。酒鱗熱。語短情長。不成別。淒咽。悔秋燈種了。星星僧髮。野橋路滑。聽江聲送客。愁如結。又空林門掩。疎簾夢阻。低共梅花說。杜陵荒。浩歌發。猶有詩傳布衾鐵。天末幾時同看。蕪城明月。

疎影

菊影和祓江

幽姿欲舞。見稜稜幾葉。空際微吐。半枕游仙。飛作輕雲。不怕滿城風雨。琉璃屏上秋多少。也澹到。痕無描處。記昨宵。灑背新霜。翠袖翦燈窗戶。尚有籬根淺醉。敲斜簪帽底。曾費回顧。笑問尊前人。瘦如花。花瘦可憐如許。東西活脫殘枝畔。合賺得。閑情詞賦。待醒來。重覓橫陳。低捲小簾寒曙。

解語花

春日見閨人搗鼓

簾遮晝影。釵翦春痕。香度深深院。玉嬉鶯婉。無愁處。小坐釘花牀畔。飛空碎遠。看一朵。翠翹難顫。驚夢回。

聲落高唐。白雨隨酥腕。長記柑筵飲散。遇紅蘭潮靨。青柳垂眼。睡霏休濺。飄鸞袖。應是細敲腸斷。微音弄。釧料無此。漁陽嬌怨。生晚寒。燈暈妝樓。敲被池人倦。

琵琶仙

乙巳早春過吳門作

帆色新年。又輕約。水枕春寒同載。堤上沽酒人家。湘梅已先賣。斜照傍。紅樓未啓。惜猶護。一層芳靄。趁燕羣歸。調鸚檻遠。塵夢都改。悄彈指。閑立平沙。更吹綠吳波。緩衣帶。堪笑天涯蹤跡。有垂楊相待。人意與東風是客。洗輦香。雨際烟外。且聽鐘度楓橋。舊情如在。

又

康山在揚州。輦土爲之。以康對山。寓此得名。今屬吳氏。乙巳二月四日。祓江招飲其上。四顧曠然。俯仰今昔。同集者尺梟授衣。各賦一解。

休恨無山。小闌外。略借江南眉色。何況山在人家。梯青喚雙屐。吹不斷。風前笑語。怕驚起。退紅簾隙。古堞飛帆。平林指塔。春望無力。舊知己。觴送花迎。畫歌舞屏。閒未頭白。誰道琵琶纔搯。賸康家陳跡。豪氣被蕭蕭草樹。甚曳裾。有此狂客。爲問天畔歸鴻。遠愁銜得。

摸魚兒

蕪城清明

杏錫香。鬧花門巷。家家風外晴穩。來時猶道江程短。定不短如愁鬢。飛絮近。作酒惡。寒輕只是無人問。紅絲硯潤。便杜老傷春。江郎賦別。難寫此時恨。西湖路。最愛山聯眉暈。游船曾記歸盡。綠楊闌角聽鶯坐。知我平生疎俊。情一寸。回首處。雲容水態還相引。天涯自哂。繞九里街中。三分月底。誰與寄芳信。

掃花游

乙巳三月二十三日。客揚州。空齋積雨。孤愁特甚。問人始知是春盡日也。黯然於懷。賦寄尺牘。折花汎舸。又夜淺燈孤。綠陰如許。舊遊閒阻。聽簷聲壓酒。醉醒無據。落魄多愁。尙記羅帶雁柱。向南浦。訝楊柳今朝。腰瘦慵舞。行偏深院宇。已負了春來。忍教春去。笑人易誤。似山中枕石。頓忘時序。小榼櫻桃。更憶西園勝聚。寄情處。畫當年。滿湖烟雨。

摸魚兒

首夏歸杭過吳淞景物清曠有會而作

綠陰陰。江南千樹。重來桃葉依舊。十年不負烟波興。付與殢人杯酒。船喚否。度一片涼雲。最戀河橋柳。凭闌望久。趁螢影高低。漁歌斷續。搖過五湖口。歸非偶。正是清和時候。深村樂事多有。焙茶煮繭。梅風裏。換得霜鱗盈斗。詩思瘦。待小草湘蘭已入騷人手。西泠永晝。汎五日輕橈。獨醒何事。散髮醉還又。

喜遷鶯

賦趙谷林三十六鷗亭

風蒲低暑。見白羽帶波。翻翻還住。闌影搖人。簾文生夢。夢入藕花深處。閑笑啼湘懷楚。晚涼外。動忘機一曲。悠然琴趣。休去尋釣艇。重理舊盟。草合垂虹路。倚扇開襟。調冰膾玉。不問是誰賓主。三十六梯明月。三十六陂秋雨。戲招手。認青天片雪。飛來詩句。

鬪嬋娟

題趙飲谷采香詞。居近滄浪亭。自榜曰小吳船。

中吳烟水微茫地。吟邊何限清感。夜深腰笛。伴漁謳冷。玉花千點。翦秀骨。香霏露染。娃宮風景。教長占。錯羨舟居好。幾雁齒。橋頭解纜。回首銷黯。仍是載酒年時。驀然低憶。薰爐絲裊。菱鑑斷腸。重唱小黃塘。粉字開還掩。縱賀老。心情未減。無端世味。如雲淡。好約我垂竿手。斜雨梅黃。凭君畫檻。

探春

次趙飲谷韻

冷硯敲秋。枯筇倚晚。西風斜掠平楚。芋熟湖田。楓明水巷。先放烟鴻飛去。還似春時節。掃不盡。閑愁吹絮。暖紅院落。誰家迎寒。猶試簫鼓。此際青門曾住。記曉碾霜輪。未教離阻。老大才華。淒涼身事。銷得筌篲。

知遇三五回圓月。怕靜夜。窺人良苦。待問梅花。何時香拂衫縷。

一萼紅

丁未始春。客吳興。郡治後圃。有愛山臺。南宋時建。蓋取東坡尙愛此山。看不足之句。日與客登其巔。蒼弁清茗。奔赴襟寫。情味灑然。如遇白石草窗。諸名勝於五百載上。乃歌此曲。以寄予懷。乍寒輕。被鄰園翠羽。喚起愛山情。烟草殘碑。風榛斷笛。千載誰記。經行想春在。樓痕幾曲。破曉霽。妝鏡見飛英。欲雪消時。無人知處。峩髻青青。飄瞥少年前夢。便移舟弄水。有若平生。西塞魚肥。東林酒熟。滋味何似浮名。待傳與。蘋香暖信。醉吟地。常憶柳邊城。回首家江非遠。十四長亭。

水龍吟

梅雨初霽。湖上山水浮動。涼氣沁人肌骨。尺鳧買舟。約子輩數人。緣孤山。掠蘇堤。入西泠橋。以泊於裏湖。時意林鼓琴。敬身作小篆數幅。欒城觴碧筩。勸客。子與尺鳧各賦此曲。極暮乃罷去。丁未五月二十五日也。

蜻蜓偷眼涼多。飛隨小舫。搖空翠。西泠五月。碧羅初染。冰壺乍洗。多麗香車。閑情椒壁。夢塵空徙。載荷心。酒苦。桐枝絃澹。看一陣。風漪細。更譜玲瓏散水。戰長林。葉閒疎吹。高寒更憶。迴峯隱舍。鳴泉僧寺。易得驚秋。菰蘆深處。此歌堪倚。漸鐘催人散。平波墜露。點青螢尾。

清平樂

題飲谷說劍圖

仙源風雅。不恨知音寡。艇子采香歸去也。袖有驪珠無價。天涯共話秋窗。吹簫載酒何妨。莫把吳鉤再看。燈前化作柔腸。

意難忘

丁未冬杪客蕪城將歸次飲谷送別韻

舊苑荒灣。正恩恩別袂。草草歡筵。放歌銷白日。轉枕夢青天。風力緊。折吳縣。寒色漸蒼然。話倦游。不如歸去。如此湖山。津頭已買篷船。尙樵歌共譜。琴趣閑編。沙河春拊馬。燈市夜飛蟬。花倚擔。菜登盤。節物又增年。問幾時。掀鬚一笑。追逐吟仙。

原作

嘉定趙 虹飲谷

煖火沙灣。聽戍樓壓笛。人罷離筵。雁聲寒墮地。霜色白彌天。思結託。奉纏絲。小別轉悽然。對斷魂。月搖津樹。雪罨寒山。載將書畫歸船。有東城別錄。南渡遺編。眉添京兆柳。衣畫孟家蟬。翦綵勝。簇春盤。轉盼入新年。待與君尋梅問鶴。共訪逋仙。

蝶戀花

戊申春暮城東周氏小園池上作

三月風顛吹斷柳。何況薔薇。落處依苔厚。折得一枝花在手。戴花人尙平安否。行徧回塘銷永晝。水影蘋香。只是侵襟袖。杜宇數聲春欲瘦。斜陽豔豔醺如酒。

憶王孫

懷紅橋舊游

小秦淮暝。小紅橋。蘭舫重來酒未銷。秋雨多從蟬鬢飄。夢迢迢。曾倚闌干弄柳條。

謁金門

七月既望湖上雨後作

凭畫檻。雨洗秋濃人淡。隔水殘霞明冉冉。小山三四點。艇子幾時同汎。待折荷花臨鑑。日日綠盤疎粉豔。西風無處減。

水龍吟

春晚倚樓見海棠葉底餘花同谷林賦

殘春能幾番風。猩雲一朵藏深翠。嫣然最小。窺人闌角。憐伊睡起。羞見當時。天衣瀉蘚。宮鬢垂地。歎宣華舊色。鳥聲啼盡。遲開處。伶俚矣。尙恐朱顏易老。倩薔薇殷勤。鉤袂樓高十二。妝輕粉瘦。綃痕寄淚。雨雨

風風鈴兒未掣。蜂兒先退。待解愁知道。前身記得。晚花流水。

國香慢

壬子冬至後三日。過馬半槎南齋。炙甜香以供客。風味幽絕。前明宣宗時。禁中製也。坐上索子譜斯闕成。半槎謂予云。昔熊訥齋請詹天游賦。輒香慶清朝慢云。願埽陳言。君於此題。當與天游競爽矣。明日以綠牋請予書之。裝成小軸。高西唐篆其首曰。甜香新唱。

雨浥芳塵。愛花瓷寶屑。百種芬氤。誰將蜜脾滋味。散作濃春。顛裊微烟。猶未寫蘭韻。如幻如真。輕翻小銀葉。舌本先參鼻觀。徐聞。漢宮遺事遠。歎尋方難和。按譜偷分茗甌。初啜。依約攪了餘熏。縹緲華胥一枕。蝶飛來。猶戀梨雲。回思殢人處。寄與當時。浣罷羅巾。

澡蘭香

癸丑淮南重午用吳夢窗韻

荷聲碧檻。蒜影紋簾。詩在枕根夢覺。釵邊綴虎。扇底彈蠅。輸與彩舟佳約。記琵琶。初見灣頭。纔舒新眉半。尊立盡梅陰。晚雨猶鳴青蕩。贏得星星短鬢。羞照江心。一規銅魄。涼生楚簟。怨人宮砂。多少玉窗羅幕。想南湖。十頃菱波。閑了微吟淺酌。還認取。天際歸帆。飛鳧闌角。

西江月

秋晚同嶰谷登烟雨樓

浮玉塔前風色銷。金鍋畔晴瀾都來收拾一樓閒。只少青山數點。望眼蒼黃越樹。醉魂清冷吳天。柳邊猶繫五湖船。西子烟中去遠。

摸魚兒

塵梅追和元人顏吟竹

怪朝來。凝芳盈席。一枝幻出清瘦。紛紜不用將犀辟。付與散花搵手。無乍有。想漠漠。輕寒昨夜穿窗透。紗籠護否。恐疎朵橫陳。探春多誤。更與灑冰溜。偷描處。漫比脂妝玉鏤。寓形休污吟袖。鹿胎幾點閑蹤跡。驚覺輭紅回首。延望久。恍翳月。吹烟正是開時候。高情似舊。笑學字蕭郎。低徊未拂。香影寫難就。

同作

錢唐陳 臯江臯

綺窗前。埃凝髻几。春蔥閑鏤疎影。園林半樹移來幻。似霧似烟還暝。看未定。想京洛。餘情喚起南枝醒。冰姿乍認。向匣鏡開邊。歌梁落處。忽動灞橋興。嬋娟面。正似輕綃掩映。恨無半點香賸。莫教瑟瑟翻飛去。吹落芳英難整。空裏景。偷墮處。前身水底還堪證。風沙漫競。好模上苔牋。依然離垢。心在玉壺冷。

踏莎行

嘉禾道中和江臯

鴨鴨隨波。鶯鶯坐樹。天涯芳草疑無路。惱人只有燕梢船。濃春又向船中度。鬪酒香留。題襟墨聚。菜花黃了忘歸去。韋娘髻子曉妝成。今朝定出滌苧否。項臯謨筆記云：嘉定中，禾妓杜章，作實心髻，低小尖巧，至晚常如曉妝，時人效之，號韋娘髻也。

露華

玉簪秋海棠同置小餅詞以寫之

楚雲夢遠。覓鬢底瑤肪。悄在秋苑。素萼乍敲。遮住青鸞輕扇。最憐付與紅兒。只隔幔紗遙見。涼颺度。嫣然笑拈。鬧掃初綰。明河墜露分半。稱香浸銅餅。膩粉零亂。幾點唾壺情淚。翠襟吹濺。倚妝靜看搔頭。又恐一枝敲斷。丹白想。亭亭夜深自遣。

浣溪紗

乙卯冬日同抱樸載酒過湖。醉耕民殯宮作

一櫂迎霜拂曉開。非關乘興訪疎梅。斷雲叫徹玉龍哀。雞酒有情應戀此。湖山如夢可重來。隴泉幽咽語初回。

南鄉子

題揮扇士女圖

思夢髻慵梳。鸚鵡驚回倚井梧。扇影似人人似月。圓初。十六盈盈十五餘。並蒂點紅蕖。更有關心好句

書不用近前頻掩面。生疎水院雲廊見也無。

蕙蘭芳引

乾隆丙辰秋七月十日。行郟城道上。殘暑猶熾。夾道楊柳依依。暫有慰于倦旅。予自庚子冬經此。已十七年。爾時樹猶未種也。江潭憔悴之感。在人更有甚于樹者。賦此闕書旗亭壁。

塵沁短衣。話前事。倦途亭午。向畏景新秋。官柳自垂萬縷。繫人舊感。問翠黛。那時何處。等再來。瞥見付與驟網鈴語。粉絮吹簾。柔枝縈扇。擁髻曾訴。念好箇江南。爭似路旁低舞。少年容易。鬢霜早聚。顛顛多長。夢畫橋烟浦。

一絡索

風走葉聲簾底。夜長燈細。秋塵不肯洗征衫。有前日。分攜淚。暗憶餘香殘醉。幾層烟水。分明新夢到伊行。但道得。想思字。

惜奴嬌

深院無人。看分月。紋疏小。閑情約。青奴漫惱。藕惹冰絲。悄一似。紅衣拗。曾道。賦微涼。單棲悟早。露簷烟襟。可暗憶。凌波擢。垂楊髻。幽花玉照。夢繞香瓔。又喚醒。煩塵埽。秋到。休更怨。西風草草。露簷烟

天香

烟草神農經不載。出於明季。自閩海外之呂宋國移種中土。名淡巴菰。又名金絲薰。見姚旅露書。食之之法。細切如縷。灼以管而吸之。令人如醉。祛寒破寂。風味在麴生之外。今日偉男髻女。無人不嗜。而予好之尤至。恨題詠者少。令異卉之湮鬱也。暇日斐然命筆。傳諸好事。

瀛嶼沙空。星槎翠翦。耕龍罷種。瑤草秋葉頻翻。春絲細吐。寄與繡囊函小。荷笛漫試。正一點。溫磨相惱。纔近朱櫻破處。堪憐薰風初裊。嬌寒戰回料峭。勝檳榔。爲銷殘飽。旅枕半敲。熏透夢闌人悄。幾縷巫雲尙在。澗唾袖餘花未忘了。喚別春燈。暗縈醉抱。

虞美人

游絲不惹東風住。和悶閑吹絮。嫩寒猶護小窗紗。試比去年。今日瘦些些。飛紅只在迴塘裏。塘下差差水。水邊杜宇盡情啼。喚得春歸。何似喚郎歸。

杏花天影

丁巳秋日舟過荷葉浦作

蘋花纔報西風信。早添得清愁上鬢。短蓑開合雨濛濛。借問小平橋。斷戍近。沿明鏡。紅疎翠暈。聽依約菱歌去盡。已涼天氣。別人時。未穩倩行雲。爲寄恨。

醉太平

戊午暮春汎舟紅橋同授衣廉風聯句

楊花滿天。榆錢滿船。太鴻綠陰湖上年年問誰尋翠鈿。授衣

橋邊酒邊樓前眼前。廉風夕陽一角闌干對春風

可憐。太鴻

減字木蘭花

過張無夜花龕

竹垣花架四面陰陰堪結夏。手捉松枝君是前身鶴阿師。楞伽堆案欲話無生誰是伴。久斷知聞一縷

茶烟裊作雲。

水龍吟

半竿殘日江城平蕪寒色新來淺。舊游似夢。閑身如葉。闌干凭徧。老去劉郎芳溫一念。最難消遣。況雨聲不管。愁人厭聽。更長處。和啼雁。無計憑他酒盞。奈依然。酒醒天遠。絲占蟾子。香盟心字。關情在眼。碧鏡春酥。青綾秋夢。紫簫幽怨。待佗時絮語。西窗今夜。把蘭燈翦。

湘月

揚州勝處。惟紅橋爲最。春秋佳日。苦爲游氛所雜。俗以大舟載酒。穹篷而六柱。旁翼闌檻。如亭榭然。每數艘竝集。或銜尾以進。則烟水之趣希矣。戊午十月十七日。風日清美。煦然如春。廉風

莫亭賓谷。葑田招子與授衣于湘。喚舟出鎮淮門。歷諸家園館。小泊紅橋。延緣至法海寺。極蘆灣盡處而止。蕭寥無人。談飲閒作。亦一時之樂也。懸燈歸櫂。吟興各不能已。相約賦念奴嬌。隔指聲一闋。而屬子序之。

客游未懶。記名園水鑰。誰與重叩。淡寫霜痕。愛到處。吹盡尋常歌酒。斷溆通煙。疎籬借暖。尙挂微黃柳。移船遙去。照人都爲詩瘦。何地更著功名。天教老子。付垂綸閑手。細數闌干問往事。春共橫波爭秀。亂影風燈。催歸晚笛。眷此情依舊。城頭生月。作去聲成鄉思時候。

風入松

憶茶

陸家休更說遺經。負了雨前盟。當時風月花瓷畔。餘甘漱。幾許看承。戲語從佗。歐九困人不止春醒。爲茶作病。病皆清。關鬲有凝冰。而今卻費閑薑桂。開芳焙。可是忘情。一瓊微聞蘭氣。半簾時夢松聲。

角招

子與趙谷林。長安別三年矣。戊午初冬。谷林自北歸。相見于邗城。塵衣風帽。同話舊游。悽然根觸子懷也。家山漸近。又復薄遽分手。子歸杭。當在冬杪。谷林家西池梅花下。談讌之樂。計日可待。因用白石老仙自度曲所云黃鍾清角調者。製一闋寄之。

話離索。相逢又是。江天雁影寥廓。近來偏憶著。並馬去程。茅店山郭。情懷最惡。向舊日。淮南棲託。看盡人閒迎送。似官道柳垂垂。任西風梳掠。休莫。琴移別調。塵銷古怨。此意真如瘧。夢歸烟漠漠。題扇書裙。三年前約。吳船乍泊。早問取。疎梅池閣。爲怕寒香瘦削。想翻笑。我歸遲。延春酌。

步月

己未歲吳山燈市甚盛用史梅溪韻

瞰月峯高。看街簾遠。物華取次如歸。夜深寒淺。春在六銖衣。望來處。紗籠萬點。見背後。釵燕雙飛。疎梅下。星移漢轉。勝似拜安妃。塵霏。行不斷。踏歌伴。輭舞。隨地成圍。天教晴穩。樂事往年稀。念游侶。餘醒尙在。問殢人。香夢誰知。匆匆裏。錫簫又曉透羅幃。

